

國朝漢學師承記下



蓬林子閱

國朝漢學師承記卷五

江永

江永字慎修婺源人少就外傳爲世俗學一日見明邱濬大學衍義補引周禮求之有書家得寫本周禮白文朝夕諷誦閉戶授徒束修所入盡以購書遂通經藝年二十一爲縣學生二十四補廩膳生六十二爲歲貢生永好學深思長於步算鍾律聲韻尤深於禮以朱子晚年治禮爲儀禮經傳通解未成而卒黃幹纂續缺漏浸

國朝漢學師承記卷五

一

多乃爲之廣擴博討從吉凶軍賓嘉五禮之次名曰禮經綱目數易稿而後定其論宣城梅氏所言歲實消長之誤曰日平行於黃道是爲恒氣恒歲實因有本輪均輸高衝之差而生盈縮謂之視行視行者日之實體所至而平行者本輪之心也以視行加減平行故定氣時刻多寡不同高衝為縮末盈初之端歲有推移故定氣時刻之多寡且歲歲不同而恒氣恒歲實終古無增損也當以恒者爲率隨其時之高衝以算定氣而歲實消長可勿論猶之月有平朔平望之策以求定朔定望而



此月與彼月多於朔策幾何少於朔策幾何俱不計也。論鍾律曰黃鍾之宮黃鍾半律也。卽後世所謂黃鍾清聲是也。唐時風雅十二詩譜以清黃起調。畢曲琴家正宮調黃鍾不在大絃而在第三絃。正黃鍾之宮爲律本。遺意亦聲律自然。古今不異理也。國語伶州鳩因論七律而及武王之四樂。夸則無射曰上宮黃鍾大蕤曰下宮。蓋律長者用其清聲。律短者用其濁聲。古樂用鈞之法。旣亡而因端可推。韓子外儲篇曰夫瑟以小絃爲大聲。大絃爲小聲。雖詭其辭以諷。然因是知古者調瑟之

法黃鍾大呂太蕤夾鍾姑洗仲呂蕤賓用半而居小絃。林鍾夸則南呂無射應鍾用全而居大絃。此皆合之以管。呂論聲律相生者始明也。論聲韻曰古韻起於吳才老。而崑山顧氏尤精。然顧氏考古之功多。審音之功淺。爲書以正顧氏。分十部之疎。而分平上去三聲。皆十三部入聲八部。虞屬魚模。又分之以屬侯幽。顧氏未之知也。先屬元寒。又分之以屬真諄。而真以後十有四韻之。當分爲二。考之三百篇用韻。畫然。顧氏未之審也。蕭至豪四韻之讀。如今音者一部也。又分以屬侯幽。在三百

篇亦盡然而顧氏未審也。覃至鹽屬添嚴又分以屬侵。自侵以後九韻以侈斂當分爲二猶之真以後當分十有四韻爲二也。顧氏亦一之侯之正音近幽顧氏不之審而轉其讀以從虞永之說蓋欲彌縫其缺也。易彖言往來上下者後儒謂之卦變言人人殊辨之曰周易以反對爲序次卦變當於反卦取之否反爲泰泰反爲否故曰小往大來曰大往小來是其例也。凡曰來曰下曰反者自反卦之外卦來居內卦也。曰往曰上曰進曰升者自反卦之內卦往居外卦也。後儒言古者寓兵於農

井田廢而兵農始分辨之曰考之春秋時兵農固已分矣。管仲參國伍鄙之法齊三軍出之士鄉十有五公與國子高子分率之而鄙處之農不與也。爲農者治田供稅不以隸於師旅也。鄉田但有兵賦無田稅似後世之軍田屯田此外更無養兵之費晉之始惟一軍旣而作二軍作三軍又作三行作五軍旣舍二軍旋作六軍以新軍無帥而復三軍其旣增又損也。蓋除其軍籍使之歸農若軍盡出於農則農民固在安用屢易軍制乎。隨武子曰楚國荆戶而舉商農工賈不敗其業此農不從

軍之證也。魯之作三軍也。季氏取其乘之。父兄弟盡  
征之。孟氏取半焉。以其半歸公。叔孫氏臣其子弟。而以  
其父兄歸公。所謂子弟者。兵之壯者也。父兄。兵之老者  
也。皆其素在軍籍。隸之卒乘者。非通國之父兄弟也。  
其後舍三軍。季氏擇二。二子各一。皆盡征之。而貢於公。  
若民之爲農者。出田稅。自仍然歸之君。故哀公曰。二吾  
猶不足。三家雖專。亦惟食其采邑。豈嘗使通國之農盡  
屬已哉。陽虎壬辰戒都。申令癸巳至此。又兵常近國都  
之證。其野處之農。固不爲兵也。卒年八十有二。所著書

周禮疑義舉要六卷。儀禮釋宮增注一卷。禮記訓義擇  
言八卷。深衣考誤一卷。禮經綱目八十八卷。律呂闡微  
十卷。春秋地理考實四卷。鄉黨圖考十卷。古韻標準六  
卷。四聲切韻表四卷。音學辨微一卷。推步法解五卷。七  
政衍金水二星發微。冬至權度。恒氣注。歷辨。歲實消長。  
辨歷學補論。中西合法擬草。各一卷。近思錄集注十四  
卷。讀書隨筆十二卷。四書典林四十卷。永爲人和易近  
人。處里黨。以孝悌仁讓爲先。人多化之。嘗援春秋傳。豐  
年補敗之義。勸鄉人輸穀。立義倉。行之三十年。一鄉之

人不知有饑饉云嘗一至江西應學使金德瑛之招也  
一游京師以同郡程編修恂延之也是時三禮館總裁  
方侍郎苞自負其學見永卽以所疑士冠禮士昏禮數  
事爲問從容答之苞負氣不服永哂之而已荆溪吳編  
修紱深於三禮質以周官疑義永是以有周禮疑舉要  
之作也後數年程吳二君皆沒永家居寂然值  
純皇帝崇獎實學

命大臣舉經術之儒有人薦永者力辭之當

朝廷開三禮義疏館纂修諸臣聞有禮經綱目一書檄

國朝漢學師承記卷五

五

下郡縣錄送以備參訂沒後一年

詔修音韻述微刑部尚書秦文恭公蕙田請於

朝令督臣取所著韻書三種進呈貯館以備採擇蓋戴  
編修震在京師文恭公延之修五禮通考戴君攜有永  
書以推步法解全篇載入觀象授時一類所以文恭知  
永爲學者而有是請也考永學行乃一代通儒戴君爲  
作行狀稱其學自漢經師康成後罕其儔匹非溢美之  
辭然所著鄉黨圖考四書典林帖括之士竊其唾餘取  
高第撥巍科者數百人而永以明經終老於家豈傳所

謂志與天地擬者其人不祥歟

### 金榜

金榜字輔之一字藁中又字檠齋歙縣人江慎修之高弟子少有過人之資與休寧戴編修震相親善承師友之訓所以學有根柢言無枝葉也乙酉

名試舉人授內閣中書在

軍機處行走乾隆壬辰以第一人及第授修撰散館後卽乞假歸徜徉林下著書自娛專治三禮以高密爲宗不敢雜以後人之說可謂謹守繩墨之儒矣戴君東原

### 國朝漢學師承記卷五

六

以司馬法賦出車徒二法難通乃舉小司徒正卒羨卒以釋之曰夏官諸司馬職亡周人軍賦莫可考見其制有正卒以起軍旅有羨卒以作田役比追胥小司徒職均土地以稽其人民而周知其數上地家七人可任也者家三人中地家六人可任也者二家五人下地家五人可任也者家二人凡起徒役無過家一人以其餘爲羨惟田與追胥竭作又云凡國之大事致民大故致餘子此正羨二卒以司馬法計之率十人而賦其一其大法也司馬法一云六尺爲步百爲畝畝百爲夫夫三

爲屋屋三爲井井十爲通通爲匹馬三十家士一人徒  
二人通十爲成成百井三百家革車一乘士十人徒二  
十人十成爲終終千井三千家革車十乘士百人徒二  
百人十終爲同同方百里萬井三萬家革車百乘士千  
人徒二千人蓋家計可任者一人一成三百家可任者  
三百人而革車一乘士徒凡三十人是爲十而賦一所  
謂凡起徒役無過家一人者也一云九夫爲井四井爲  
邑四邑爲邱邱十六井有戎馬一匹牛三頭是四匹馬  
邱牛四邱爲甸甸六十四井出長轂一乘馬四匹牛十  
二頭甲士三人步卒七十二人戈楯具備謂之乘馬甸  
六十四井通上中下地率之定受田二百八十八家計  
可任者二家五人凡七百二十人出長轂一乘步卒七  
十二人亦十而賦一甲士三人者其軍吏所謂惟田與  
追胥竭作者也前法家可任者一人十賦一爲正卒後  
法可任者二家五人十賦一爲通正羨之卒小司徒職  
凡起徒役無過家一人不言可任者蒙上可任也者家  
三人二家五人家二人省文非謂家作一人爲徒役其  
云田與追胥竭作亦非竭作此家三人二人爲羨卒也

自均土地至田與追胥竭作爲小司徒稽民數而辨其  
可任者之事下云大事致民大故致餘子爲小司徒臨  
事徵調之事族師職曰五家爲比十家爲聯五人爲伍  
十人爲聯四閭爲族八閭爲聯使之相保相愛相共以  
役國事士師職曰掌鄉合州黨族閭比之聯與其民人  
之什伍使之相安相愛以此追胥之事明聯其什伍十  
賦一爲卒爰使其居者相與其馬牛車輦兵器諸用  
物是爲周人以地與民制賦之法孫武言興師十萬  
不得操事者七十萬家彼以八家賦出一卒七家相與

國朝漢學師承記卷五

人

其其用故云不得操事是猶略具周人任民遺意管子  
治齊作內政寄軍合卒伍定乎里軍政成乎郊其制士  
鄉十五始家出一人爲卒班孟堅所謂隨時苟令以求  
欲速之功故不能充王制者也詩碩魯僖曰公車千乘  
公徒三萬與司馬法革車一乘士十人徒二十人數合  
春秋成元年作邱甲說者謂此甸所賦使邱出之邱十  
六井通上中下地二而當一爲七十二家亦家出六人  
爲卒主戰國時蘇秦謂臨淄之中七萬戶下戶三男子  
臨淄之卒固已二十一萬始盡役其家之正義爲卒而

禍變亟矣。儒者於周官軍數，往往襍引管子釋之，而於司馬法與周官更相表裏，轉茫莫辨甚矣。其惑也。小司徒職曰：乃經土地而井牧其田野。九夫爲井，四井爲邑，四邑爲邱，四邱爲甸，四甸爲縣，四縣爲都。以任地事而令貢賦。凡稅斂之事，此經主於任地合賦。邱甸縣都者，出賦之定數也。古者一成百井，定出賦六十四井，謂之甸。甸之言乘也。謂出兵車一乘，賦法蓋權輿於此。刑法志曰：一同百里，提封萬井，除山川沈斥城池邑居園囿街路三千六百井，定出賦六千四百井。戎馬四百匹。

兵車百乘，一封三百一十六里，提封十萬井，定出賦六萬四千井。戎馬四千匹，兵車千乘。天子畿方千里，提封百萬井，定出賦六十四萬井。戎馬四萬匹，兵車萬乘。今卽一同之內，出賦六千四百井，計之凡爲甸者百爲縣者二十有五，爲都者六有奇。賦法備於一甸，小司徒經土地必計及一都之田，而後上中下地通率二而當一井牧之法。如此鄭君釋其制，爲造都鄙更爲治洫治澮之說，榜謂大司徒之職，凡造都鄙制其地域而溝封之，以其室數制之，不易之地家百畝，一易之地家二百畝。

再易之地家三百畝周官造都鄙之法具於是至於匠人爲溝洫司險設國之五溝五涂皆掌其事於官其用民力也則均人均其力征豐年公旬用三日中年公旬用二日無年公旬用一日謂緣邊一里治洫十里治澮非古制也如鄭君說一同百里僅四千九十六井出田稅又與司馬法邱乘之制不合小司徒有九夫爲井之法遂人有十夫有溝之法地之險夸異形廣狹異數因地勢而制其宜凡不可井者濟以遂人法而地無曠土孟子請野九一而助國中什一使自賦國中城郭宮室

差多涂巷又廣於遂人法爲宜是小司徒實與遂人聯事通職不以鄉遂都鄙異制審矣周禮泉府以國服爲之息元明諸人以為乃新莽之制劉歆取以羸入周官宋王安石竊其說爲青苗法乃周禮之遺害也辨之曰泉府凡民之貸者與其有司辨而授之以國服爲之息注云有司其所屬吏也與之別其貸民之物定其賈以與之鄭司農云貸者謂從官借本賈也故有息使民弗利以其所賈之國所出爲息也假令其國出絲絮則以絲絮償其國出絺葛則以絺葛償元謂以國服爲之息

以其於國服事之稅爲息也。於國事受園廬之田。而其萬泉者。則期出息五百。王莽時民貸以治產業者。但計贏所得。受息無過歲什一。榜謂凡民之貸者。謂從官借本賈。先鄭說是也。以國服爲之息。以其於國服事之稅爲息。後鄭說是也。泉府市官之屬。以受市之征布爲職。其以市之征布貸於賈人。以賈與上。經以征布斂市之滯貨同義。二者皆恤商阜貨。泉府之職也。其言凡民之貨者。對下有司言之。謂之民泉。府不得與國人爲貸。周官旅師職云。掌聚野之糶粟。屋粟。閒粟。凡用粟。春頌而秋斂之。此貸於國人者。不令出息。爲其無所取贏也。賈人貸官財。以權子母之利。則有息。農民受田。計所收者。納稅。賈人貸泉。計所得者。出息。其息或以泉布。或以貨物。輕重皆視田稅爲差。是謂以國服爲之息。朝士凡民同貨財者。令以國法行之。後鄭釋國法爲國服之法。然則同貨財者爲貸本。以賈者與經言。凡國事之財用。取具焉。指所受市之征布。大府所云關市之賦。以待王之膳服是也。外府職之。其以國服爲之息者。謂之餘財。下經歲終納其餘是也。職幣職之。後儒以經文以國服爲

之息與下凡國事之財用取其焉文相聯屬。誤合爲一事。至依託泉府以行其好。爰據二鄭之言贊而辨之。如此。又論禘祭云。天祭莫大於園邱。地祭莫大於方澤。與宗廟禘其祖之所自出。三者皆禘。見於鄭君釋周官經大司樂。後儒習知宗廟有禘。疑禘非祭天地之名。惟鄭君識古能述其義。周語禘郊之事。則有全烝。魯語天子日入監九御。使潔奉禘郊之粢盛。楚語禘郊不過繭栗。烝嘗不過把握。又曰。天子禘郊之事。必自射其牲。王后必自舂其粢。諸侯宗廟之事。必自射其牛。刲羊擊豕。夫

人必自舂其盛。又曰。天子親舂禘郊之盛。王后親繅其服。其言禘郊與宗廟烝嘗對文。明禘非宗廟之祭。王制祭天地之牛角繭栗。宗廟之牛角握。與國語禘郊繭栗。烝嘗把握之文合。表記天子親耕。粢盛秬鬯。以事上帝。與國語天子親舂。禘郊之盛文合。天地之祭名禘。著於此矣。周人歲有事於天者。冬至禘昊天。啟蟄郊上帝。及四時迎氣於四郊。兆祀五帝。凡七祀。大宗伯以禋祀祀昊天上帝。司服祀昊天上帝。則服大裘而冕。祀五帝亦如之。典瑞四圭有邸。以祀天。旅上帝。明昊天與上帝殊。

掌次大旅上帝則張氈案設皇邸祀五帝則張大次小次設重帘重案明上帝與五帝殊其冬至禘昊天以饗配啟蟄郊上帝以稷配魯語是以言周人禘饗而郊稷四氣迎氣祀五帝則以大皞炎帝黃帝少皞顓頊配冬至禘昊天國語謂之禘戴記通謂之郊郊特牲曰郊之祭也迎長日之至也大報天而主日也又曰郊之用辛也周之始郊日以至祭義曰郊之祭大報天而主日配以月禮家舊說言日以周郊天之月而至陽氣新用事順之而用辛日此冬至圜邱之禘通得郊名也對啟蟄而郊言之故謂之始郊大司樂職凡樂圜鐘爲宮黃鍾爲角大蕤爲徵姑洗爲羽鼙鼓鼙鼓孤竹之管雲和之琴瑟雲門之舞冬日至於地上之圜邱奏之若樂六變則天神皆降可得而禮矣經年冬日至於圜邱奏之是著啟蟄而郊無此降神之樂鄭君釋天神地元人鬼三大祭爲禘引祭法周人禘饗而郊稷謂此祭天圜邱以饗配之又言人鬼則主后稷既於圜邱之禘宗廟之禘區別不疑其釋喪服小記及大傳王者禘其祖之所自出以其祖配之又以禘爲郊稷與大司樂宗廟之中禮

人鬼之文違異喪服小記曰王者禘其祖之所自出以其祖配之而立四廟漢韋元成等四十四人奏議云禮王者始受命諸侯始封之君皆爲太祖以下五廟而遞毀周之所以七廟者以后稷始封文王武王受命而王是以三廟不毀與親廟四而七然則周人祖文武祖之所自出主稷也稷爲太祖廟立文世室武世室配之皆世世不毀又下禘其親廟四所謂以其祖配之而立四廟也逸禮禘於太廟禮毀廟之主升合食而立二尸又曰獻昭尸如穆尸之禮又曰毀廟之主昭共一牢穆共一牢祝詞稱孝子孝孫此禘祭之見於逸經者毀廟之主立二尸是昭共一尸穆共一尸祝詞稱孝子明各祭於其廟故於禘廟稱孝子也春秋公羊傳大事者何大禘也毀廟之主陳於太祖未毀廟之主皆升合食於太祖曾子問七廟無虛主虛主者惟禘祭於祖而逸禮有七尸之文禮器周旅酬六尸鄭注云后稷尸發爵不爇旅此經傳之言禘禘者周公制禮之時文武之主尙在親廟故禘遷主於太廟而立昭穆二尸逸禮禘祭惟七尸則禘之遷主無尸天子立廟得及其始祖之所自出

凡祭皆然。不惟禘也。禘祭禮盛事。殷故名。大祭。春秋傳曰。魯有禘樂。明堂位。季夏六月。以禘禮祀周公。明其禮樂。與時祭殊。禘祫俱及。遷廟之主。諸侯則有祫。無禘。故記曰。禮不王。不禘。大祭有禘名。以別於郊。宗廟之祭。有禘名。以別於祫。禘郊禘祫。因其散見之文。可考如此。論感生帝曰。生民之詩。具矣。詩曰。履帝武敏歆。攸介攸止。載震載夙。載生載育。時維后稷。言后稷感神靈之氣而生也。曰。誕后稷之穡。有相之道。曰。誕降嘉種。維秬維秠。維糜維芑。言后稷爲天所助。以成稼穡之功也。曰。載燔

載烈。以興嗣歲。曰。其香始升。上帝居歆。言后稷肇祀。以祈豐年。而上帝歆享之也。或曰。帝。或曰。上帝。皆指天帝而言。若如傳釋。帝爲高辛氏之帝。則從於帝。而見於天。因以生子。此亦何足稱異。下經。寘之隘巷。寘之平林。寒冰。不且大遠於事情乎。周人祈穀之郊。實本於后稷之肇祀。今由生民之詩。繹之。鄭君謂郊祀爲祀感生帝。說非無據。但月令。孟春乃擇元日。祈穀于上帝。春秋傳。孟獻子曰。夫郊祀后稷。以祈農事也。是故敢蟄而郊。郊而後耕。夫曰祈穀。曰祈農事。而絕不及於祭感生者。蓋詩

表先代之神靈禮嚴百王之祀事故不同也大傳王者禘其祖之所自出以其祖配之諸侯及其太祖大夫士有大事省於其君于祫及其高祖是爲尊者尊統上卑者尊統下之義喪服小記王者禘其祖之所自出以其祖配之而立四廟則以后稷始封文武受命稱王與四親廟對言爲七廟二條皆爲宗廟之禘與祭天無涉且禘饗郊饗禮家或混禘於郊未嘗混郊於禘如鄭君說則祈穀又蒙禘名矣故鄭志答趙商云悉信亦非不信亦非斯言也敢援以爲治經之大法此其說之尤著者

其論三江世儒多是之獨王光祿西泚與藩不以爲然  
年老得脾痛疾卧牀蓆間手定禮箋十卷未幾卒

戴震

戴震字慎修一字東原休寧人祖甯仁父弁皆不仕君年十歲乃能言就傅讀書過目成誦塾師授以大學章句右經一章問其師曰此何以知爲孔子之言而曾子述之又何以知爲曾子之意而門人記之師曰此子朱子云爾又問朱子何時人曰南宋又問曾子何時人曰東周又問周去宋幾何時曰幾二千年曰然則子朱子

何以知其然。師不能答。讀書一字必求其義。塾師畧與傳注訓解之意。不釋師惡其煩。乃取許氏說文解字令檢閱之。學之三年通其義。於是十三經盡通矣。隨父客南豐。課學童於邵武。自邵武歸。年甫二十。同縣程中允洵一見奇之。時江君慎修來歛。見君目爲儒者。一日舉厯算中數事曰。吾積疑十有餘年。而未剖析者。君爲之比較言其所以然。江君驚喜曰。今之定九也。年二十八補縣學生。家屢空而學日進。著考工記圖。屈原賦注。句股割圓記。流傳浙東西。天台齊侍郎召南讀其書。恨不

識其人。江南惠定宇沈冠雲二徵君皆引爲忘年交。乾隆二十七年壬午舉於鄉。策蹇至京。師困於逆旅。人皆以狂生目之。幾不能供饘粥。獲交於錢少詹大昕。稱爲天下奇才。秦文恭公纂五禮通考。求精於推步者。少詹舉君名。文恭延之。纂觀象授時一類。後高郵王文肅公安國請君至家塾。課其子念孫。一時館閣通人如河間紀庶子昫。嘉定王編。修鳴盛。青浦王蘭泉先生。大興朱笥河先生。皆與之定交。從此海內知東原氏矣。試禮部不第。後朱方伯珪招之游晉。修汾州府志。三十八年奉

召充四庫全書館纂修官三十九年乙未  
特命與會試中式者同赴

廷對授翰林院庶吉士四十二年五月卒於官享年五十有五生平無嗜好惟喜讀書詞義鉤棘難通之文一再讀之渙然冰釋其學長於考辨立一義初若創獲及參互考之確不可易春秋昭公二十二年十月玉子猛卒而其夏秋已兩書王猛說者莫得其解解之曰王猛與鄭忽皆以國氏者也王者諸侯目王畿之辭非天子之號春秋凡書王猶列國之書其國書天王猶列國之

書爵故王人與列國書人同爲微者王猛與鄭忽同以國氏忽未卽位而出奔歸不得書爵書世子正其復國也王子猛未卽位稱王故卒稱王子若先正其號曰王不得復稱王子矣周髀言北極璿璣四游又言正北極樞璿璣之中後人多疑其說解之曰正北極者魯論之北辰今人所謂赤道極也北極璿璣者今人所謂黃道極也正北極者左旋之樞北極璿璣每晝夜環之而成規冬至夜半在正北極下是爲北游所極日加卯之時在正北極之左是爲東游所極日加午之時在正北極

之上是爲南游所極。日加酉之時，在正北極之右，是爲西游所極。此璿璣之一日四游所極也。冬至夜半起正北子位，晝夜左旋一周，而又過一度，漸進至四分周之一。則春分夜半爲東游所極，又進至夏至夜半爲南游所極，又進至秋分夜半爲西游所極。此璿璣之一歲四游所極也。虞夏書在璿璣，玉衡以齊七政，蓋設璿璣以擬黃道極，世失其傳也。今人所用三角八線之法，本出於句股，而尊信西術者，輒云句股不能御三角，折之曰周髀云圓出於方，方出於矩，矩出於九九八十一三角。

中無直角，則不應乎矩，無例可比矣。必以法御之，使成句股而止，入線比例之術，皆句股法也。嘗謂儒者治經，宜自爾雅始。世所傳郭注已刪節不全，邢疏又多疎漏。如釋言桃克也，六經無桃字。鄭注樂記，孔子閒居，皆訓橫爲充。橫桃古通用。書光被四表，漢書引爲橫被四表。今孔傳猶訓光爲充，文譌而義不殊也。釋言麻廕也，卽詩不可休思之休，釋木桑柳醜條，卽詩蠶月條桑之條。莊子云已而為之者已，而不知其然，當從釋詁解已爲此。其考證通悟多如此。水經注譌舛多矣。王伯厚引經

文四事。其三事皆注之。濶於經者。則經注之。淆南宋時已然。君獨尋其義例。區而別之。云經文每一水云某水出某郡縣。此下不更舉水名。注則兼及所納羣川。故須重舉。經云過某縣者。統一縣而言。注則詳言所逕委曲。故有一縣而再三見者。經據當時縣治。善長作注時。縣邑流移。是以多稱故城。經無言故城者也。經例云過。注例云逕。以是推之。經注之淆者。可正也。閻百詩。顧景范。胡拙明。雖善讀古書。猶未悟斯失。至君始釐正之。今武英殿所刊。卽用其校本。海內始復見此書之真面目。

焉。嘗論學云。經之至者。道也。所以明道者。辭也。所以成辭者。字也。必由字以通其辭。由辭以通其道。乃可得之。又云。治經之難。雖一事必綜其全。而覈之。誦堯典。至乃命羲和。不知日月星辰之所以運行。則掩卷不能卒業。誦周南召南。自關雎而往。不知古音。徒強以協韻。則已齟齬失讀。誦古禮。先士冠禮。不知古者宮室衣服等制。已迷於其方。莫辨其用。不知古今地方沿革。則禹貢職方。山鎮川澤。春秋列國疆域。會盟攻戰之地。失其處所。不知古今推步之長。則如夏書之辰。不集於房。魯太史

引以爲正陽之月孟夏東晉古文尚書繫之季秋小雅  
十月之交鄭康成以爲周正十月劉原父以爲夏正十  
月春秋傳兩記日南至歷代史志載步算家上考曲合  
其一而卒違其一儒者何以識古今之真僞辨箋解之  
得失決魯歷至朔之當否不知少廣旁要則考工之器  
不能因文而推其制不知鳥獸魚蟲草木之名號狀類  
則比興之意乘六書之學訓詁音聲未始相離聲與音  
又經緯衡從宜辨魏有孫叔然創立翻語厥後考經論  
韻悉用之晉人以譯西域釋氏之言釋氏之徒羣習其  
法因竊爲已有謂來自西域儒者數典不能記憶也管  
呂言五聲十二律宮位乎中黃鍾之宮四寸五分爲起  
律之本學者蔽於鍾律失傳之後不追溯未失傳之先  
宜乎其說之多鑿也又訓學者二曰私曰蔽私生於欲  
之失而蔽生於知之失異氏尙無欲君子尙無蔽異氏  
之學主靜以爲至君子強恕以去私而問學以去蔽主  
以忠信而止於明善凡生於其心必發於其事私者違  
己以縱欲無良而潛不良明無私矣尙不能無蔽蔽者  
不求諸事情以其意見信爲義理公而不能明廉潔而

流於刻記曰夫民有血氣心知之性而無喜怒哀樂之常應感起物而動然後心術形焉凡有血氣心知於是乎有欲性之徵於欲聲色臭味而愛畏分既有欲矣於是乎有情性之徵於情喜怒哀樂而慘舒分既有欲有情矣於是乎有巧與智性之徵於巧智美惡是非而好惡分生養之道存乎欲者也感通之道存乎情者也二者自然之符天下之事舉矣盡美惡之極致存乎巧者也宰御之方由斯而出盡是非之極致存乎智者也聖賢之德由斯而備二者亦自然之符精之以底於必然

天下之能舉矣君子之治天下也使人各得其情各遂其欲勿悖於道義君子之自治也情與欲使一於道義夫遏欲之害甚於防川絕情去智充塞仁義人之飲食也養其血氣而其問學也養其心知是以貴乎自得血氣得其養雖弱必強心知得其養雖愚必明是以貴乎擴克君子獨居思仁公言言義動止應禮竭所能之謂忠履所明之謂信平所施之謂恕馴而致之仁且智不私不蔽者也君子之未應事也敬而不肆以虞其疏事至而動正而無邪以虞其僞必敬必正而要致於中和

以虞其偏其謬戒疏在乎戒懼去僞在乎慎獨致中和在乎達禮精義至仁盡倫天下之人同然而歸之善可謂至善矣夫以理爲學以道爲統以心爲宗探之茫茫索之冥冥不若反求諸六經此原善之書所以作也其所撰述有毛鄭詩考正四卷考工記圖二卷孟子字義疏證三卷方言疏證十三卷原善三卷原象一卷句股割圓記三卷策算一卷聲韻考四卷聲類表十卷儀禮正誤一卷爾雅文字考十卷屈原賦注四卷九章補圖一卷古歷考二卷歷問二卷水地記一卷戴氏水經注

國朝漢學師承記卷五

二十三

四十卷直隸河渠書六十四卷文集十卷皆曲阜孔戶部繼涵爲刊行之君沒後十餘年

高廟校刊石經一日

命小璫持君所校水經注問

南書房諸臣曰戴震尙在否對曰已死

上歎惜久之時人皆謂君若不死必充纂修官嗟乎君

以庶吉士得邀

特達之知亦可謂稽古之榮矣同時學者郡人鄭牧方矩程瑤田汪龍鄭方二人事蹟不得其詳瑤田字易田

又字易疇。歙人。乾隆庚辰舉人。太倉州校官。著有通藝錄行於世。汪龍字蟄泉。乾隆丙午舉人。著有毛詩申成。毛詩異義。皆未刊行。親授業者。高郵王念孫。字懷祖。乾隆乙未進士。授庶吉士。散館。改主事。官至直隸永定河道。精於訓詁。著有廣雅疏證十卷。子引之。字伯申。嘉慶己未。姚文田榜。以第三人及第。今官翰林院侍講學士。能世其學。段大令。玉裁。字若膺。一字懋堂。金壇人。乾隆庚辰舉人。官四川巫山縣知縣。講求古義。深於小學。著書滿家。刊行者。惟詩經小學錄四卷。說文解字注三十

國朝漢學師承記卷五

二十四

二卷。盧學士文弼。紀相國昫。邵學士晉涵。任侍御大椿。洪舍人榜。汪孝廉元亮。皆同志之友。而問學焉。孔檢討廣森。則姻婭而執弟子之禮者也。懋堂大令之婿。曰龔麗正。號闇齋。仁和人。以懋堂爲師。能傳其學。著有國語韋昭注疏。嘉慶丙辰進士。今官禮部祠祭司郎中。

國朝漢學師承記六

甘泉江藩纂

盧文弨

盧文弨字紹弓號磯漁又號檠齋晚更號弓父抱經其堂顏也人稱曰抱經先生其先自餘姚遷杭州父存心恩貢生應博學宏詞科不第母馮馮景山公之女也文弨生而篤實少不好弄以讀書爲事既稟家學又得外王父之緒論已知學之所向矣長爲桑調元敬甫婿師事之於是學有本原不爲異說所惑初名嗣宗爲錢塘

國朝漢學師承記卷六

縣學生員繼由餘姚祖籍改今名援例入監乾隆戊午中式順天舉人壬戌考授內閣中書壬申

恩科秦大士榜第三人及第授翰林院編修丁丑

命上書房行走由左春坊左中允洊至翰林院侍讀學士充乙酉廣東正考官旋

命提督湖廣學政戊子以學政言事不合例部議左遷明年乞假養親歸乾隆乙卯十一月二十八日卒於常州龍城書院年七十有九紹弓官京師與東原交善始潛心漢學精於讎校歸田後二十餘年勤事丹鉛垂老

不衰所校之書大戴禮記左傳經典釋文逸周書孟子  
音義荀子方言釋名賈誼新書獨斷春秋繁露白虎通  
呂氏春秋韓詩外傳顏氏家訓封氏聞見記諸書又取  
易禮注疏呂氏讀書記魏書宋史金史新唐書列子申  
鑿新序新論諸本脫漏者薈萃一書名曰羣書拾補抱  
經堂文集三十四卷及鍾山札記龍城札記刊行於世

紀昀

紀昀字曉嵐一字春帆晚年自號石雲獻縣人也世爲  
河間著姓祖天申有善行父容舒官姚安太守河間爲

九河故道天雨則窪中汪洋成巨浸夜有火光天申夜  
夢火光入樓中而公生火光遂隱人以爲公乃靈物託  
生也少而奇穎讀書過目不忘夜坐暗室內二日爍爍  
如電光不燭而能見物比知識漸開光即斂矣年二十  
四乾隆丁卯科解元甲戌成進士授庶吉士散館授編  
修己卯充山西鄉試正考官庚辰充會試同考官辛巳  
京察以道府記名壬午克順天鄉試同考官  
命提督福建學政於癸未授侍讀明年丁父憂服闋充  
日講起居注官擢左庶子戊子授貴州都勻知府以四

品留任晉侍讀學士緣事呈誤發烏魯木齊効力至成  
所時遣戍單丁五年內積至六千人爲都統具奏稿得  
旨減釋爲民辛卯

名還授編修二十八年擢侍讀

命爲四庫全書館總纂官丙午授侍讀學士克

文淵閣直閣事日講起居注官己亥擢詹事旋晉內閣  
學士壬寅授兵部右侍郎仍兼直閣事改任不開缺乃  
異數也又轉左侍郎甲辰充會試副考官知武會試貢  
舉乙巳晉左都御史丙午轉禮部尙書克

國朝漢學師承記卷六

三

經筵講官戊申

賜紫禁城騎馬充武會試正考官壬子畿輔水災奏請  
截留南漕萬石設十廠賑饑全活無算嘉慶元年丙辰  
充會試正考官轉兵部尙書己未充武會試正考官癸  
亥六月以八月開秋

上遣官賚

上方珍玩賜之是年奏婦女猝遭強暴捆縛受污不屈  
見戕者例無旌表臣謂捍刃捐生其志與抗節被殺者  
無異如忠臣烈士誓不從賊而紮縛把持雖使跪拜可

謂之屈膝賊廷哉請

敕交大學士九卿科道公議與未被汚者畧示區別量  
予旌表大學士保甯等議奏如凶手在兩人以上顯係  
孱弱難支與強姦被殺者一體予旌飭交各督撫勘明  
情形請

旨定奪

報可乙丑正月奉

旨調禮部尚書協辦大學士加太子少保管國子監事  
十五日卒於位年八十有二奉

國朝漢學師承記卷六

四

旨紀昀學問淹通辦理四庫全書始終其事十有餘年  
甚爲出力由翰林洊歷正卿服官五十餘載本年正月  
甫經擢襄綸閣晉錫宮銜遽聞溘逝深爲軫惜加恩賞  
陀羅經被派散秩大臣德通帶同侍衛十員前往賜奠  
卹典查例具奏  
賜祭葬  
予諡文達公於書無所不通尤深漢易力闢圖書之謬  
四庫全書提要簡明日錄皆出公手大而經史子集以

及醫卜詞曲之類。其評論抉奧闡幽。詞明理正。識力在王仲寶阮孝緒之上。可謂通儒矣。胸懷坦率。性好滑稽。有陳亞之稱。然驟聞其語。近於詼諧。過而思之。乃名言也。公一生精力。粹於提要一書。又好爲稗官小說。而嬾於著書。少年間有撰述。今藏於家。是以世無傳者。今錄公所作戴氏考工記圖序一篇。以見梗概。序曰。戴君東原始爲考工記作圖也。圖後附以己說。而無注。乾隆乙亥夏。余初識戴君奇。其書欲付之梓。遲之半載。戴君乃爲余刪取。先後鄭注。而自定其說。以爲補注。又越半載。

書成。仍名曰考工記圖。從其始也。戴君語予曰。昔丁卯戊辰間。先師程中允出是書。以示齊學士。次風先生學士一見而歎曰。誠奇書也。今再遇子奇之。是書可不憾已。戴君深明古人小學。故其考證制度字義。爲漢以降儒者所不能及。以是求之。聖人遺經發明獨多。詩三百尚書二十八篇。爾雅等。皆有撰著。自以爲恐成書太早。而獨於考工記。則曰。是亞於經也者。考證雖難。要得其詳。則止矣。余以戴君之說。與昔儒舊訓。參互校覈。載未之軼。明其當作軼。不得與輿人之軼。軼二名溷淆。今字

書併軻字無之。車人徹廣六尺，以高長車廣當相等。兩轅之間六尺，旁加輻內六寸，輻廣三寸，綆寸，合左右凡二尺。則大車之徹亦八尺。字譌入爲六。弓人膠三銖，一弓之膠不得過兩有十銖，二十五分銖之十四。正其當爲三銖。此皆記文之誤。漢儒已莫之是。正者，後鄭謂軻輿後橫木，戴君乃曰：軻人言軻間左右名軻之證也。加軻與輿，弓長庇軻，軻方象地，前後左右通名軻之證也。軻人任正衡，任鄭以當軻與衡，而謂軻爲輿下三面材，軻式之所樹。戴君乃曰：此爲下當免圍軸圍發其意也。

若軻式之所樹，宜記於輿人。今軻人爲之，殆非也。鄭以戈胡句，倨外博爲胡，上下戴君曰：此不宜與。已倨已句，字義有異。鄭引許叔重說文解字及東萊稱證，鏐數同。戴君乃曰：鏐之假借字作境，鏐之假借字，史記作率。漢書作選，伏生尙書大傳作饌，數小大相懸，合爲一未。然也。戟刺長短無文。鄭氏旣未及賈公彥云：蓋與胡同。六寸戴君則曰：戈一援，戟二援也。中直援名刺，與枝出之援同。長七寸有半寸刺，連內爲一直刃。通長尺有二寸，猶夫戈之直刃。通長尺有二寸也。桃氏爲劍，中其莖。

設其後鄭訓設爲大謂從中已後稍大之戴君曰不當與設其旋設其羽之屬異義後謂劍環在人所握之下故名後與劍首對稱矣鍾之鉦間無文鄭以爲與鼓間六等而合舞廣四爲鍾長十六戴君乃曰鍾自銑至鉦自鉦至舞歛網以二準諸句股濶銑間八鉦間亦八是爲鍾長十六舞者其上覆修六廣四鍾蓋羨之度不當在鍾長之數玉案以承棗臬莫詳其制戴君引檠禁及漢小方案定其有四周而局足廬人句兵欲無彈刺兵欲無娟鄭皆訓之爲掉戴君讀彈如矩蠲之蠲轉掉也

國朝漢學師承記卷六

娟搖掉也其所以補正鄭氏注者精密類如此他若因嘉量論黃鍾少宮因玉人土圭匠人爲規識景論地與天體相應寒暑進退晝夜永短之理辯天子諸侯之宮三朝三門宗廟社稷所在詳明堂个與夾室之制申井田溝洫之法觸事廣義俾古人制度之大暨其禮樂之器昭然復見於今茲是書之爲治經所取益固鉅然戴君不喜馳騁其辭但存所是文畧又於輶人龍旂鳥旗之屬梓人篋虞車人大車羊車之等圖不具其言曰思而可得者微見其端要留以待後學治古文者之致思

可也。斯誠得論著之體矣。余獨慮守章句之儒，不知引伸膠執，舊聞沾沾然動其喙也。是以論其大指，以爲之序。首同時翁君覃谿者，亦爲漢學。收藏金石碑版文字，著有經義考，補兩漢金石文字記，行於世。翁君，各方綱大興人。乾隆丁卯科舉人。王申人。書不。恩科成進士，授廣吉士，散館，授編修，官至內閣學士，兼禮部侍郎，因老疾，以學士歸田。無籍會編第一

邵晉涵

邵晉涵，字與桐，號二雲，餘姚人也。祖向榮，康熙壬辰進

國朝漢學師承記卷六

八

士。父佳銳，增廣生。君生而穎異，少多疾，左目微昏，然讀書十行並下，終身不忘。乾隆乙酉中式本省鄉試舉人。典試者錢先生竹汀也。越六年，禮部會試第一。

賜進士出身。乾隆三十八年

詔修四庫全書，金壇首以君名入告。

名赴闕下，除翰林院庶吉士，充纂修官。逾年授編修。後御試翰詹，名列二等。遷右中允，洊官至侍講學士，兼文淵閣直閣事。於書無所不讀，而非法之書，不陳於側。嘗謂爾雅乃六藝之津梁，而邢疏淺陋，乃別爲正義，兼

采舍人樊光李巡孫炎諸家之注有未詳者據他書補之今之學者皆舍邢而宗邵矣在四庫館時永樂大典載有薛居正五代史乃會粹編次其闕者以冊府元龜諸書補之由是薛史復傳竹汀先生閒論宋史紀傳南渡後不如東都之有法甯宗以後又不如前三朝之粗備微特事迹不詳卽褒貶亦失其實君聞而善之取熊克李燾李心傳陳均劉時舉所撰之書及宋人筆記撰南都事畧以續王偁之書詞簡事增正史不及也君嘗預修

國史館中收貯

先朝史冊以數千計總裁問以某事答曰在某冊第幾頁中百不失一感訝以爲神人焉撰述又有孟子述義穀梁正義韓詩內傳攷

皇朝大臣諭述錄翰軒日記南江文集皆實事求是爲學者有益之書君在日下教授生徒以自給足不詣權要之門所以迴翔清署二十餘年而官止四品也君少從山陰劉文蔚豹君童君二樹游習聞鼓山南雷之說於明季黨禍緣起奄寺亂政及唐魯二王本末從容談

論往往出於正史之外自君謝世而南江之文獻亡矣  
任大椿

任大椿字幼樞一字子田興化人爲諸生時與同邑侍  
鷺川朝詩歌唱和藝林稱之乾隆壬午科舉人三十四  
年己丑二甲第一各進士授禮部主事轉郎中陝西道  
監察御史充四庫全書館纂修官子田與東原同舉於  
鄉於是習聞其論說究心漢儒之學著有弁戩釋例十  
卷深衣釋例三卷字林考逸八卷小學鉤沈二十卷子  
田詩集四卷同時有歸安丁小正各杰者謂曾著字林

國朝漢學師承記卷六

十

考逸一書稿本存子田處子田竊其書而署其名作書  
徧告同人一時傳以爲笑然子田似非竊人書者今其  
族弟兆麟又采獲一百五十餘條爲考逸補正云兆麟  
字文田震澤籍諸生薦舉孝廉方正嘗注夏小正本鄭  
仲師周官注移王夫出火一條在二月又移時有見稊  
始收一條在五月又爲補入采芑雞始乳二條王光祿  
禮堂序以爲確當絕倫也第子中以經術著者山陽汪  
廷珍字瑟庵十三經義疏皆能闡誦不遺一字舉經史  
疑義叩之應答無滯義乾隆丙午科舉人己酉

恩科胡長齡榜以第二人及第今官內閣學士兼禮部侍郎胡長齡字西庚一字印渚通州人博覽羣籍說經以康成爲宗乾隆癸卯舉人己酉

恩科第一人及第今官兵部侍郎

洪榜

洪榜字汝登一字初堂歙縣人也年十五補邑庠生乾隆乙酉選拔與兄朴同應

召試梁文定公國治時爲安徽學使評其賦曰詞霏玉屑則弟勝於兄文抱風雲則伯優於仲朴授中書而榜

國朝漢學師承記卷六

未獲雋然以文章見知於文定乃從遊至晉旋中乾隆戊子科舉人丙申應天津

名試第一授中書舍人卒年三十有五榜少與同郡戴君東原金君輔之交粹於經學著有明象未成書終於益卦因鄭康成易贊作述贊二卷其解周易訓詁本兩漢行文如先秦又明聲均撰四聲均和表五卷示兒切語一卷江氏永切字六百十有六是書增補百二十九字又以字母見溪等字注於廣韻之目每字之上以定喉吻舌齒唇五音蓋其書宗江戴二家之說而加詳焉

平生著述甚多皆未卒業有周易古義錄書經釋典詩經古義錄詩經釋典儀禮十七篇書後春秋公羊傳例論語古義錄初堂讀書記初堂隨筆許氏經義諸書留心奇遁之術以其述犯造物忌病中舉所著畀之火唯新安大好紀麗久已刊行爲人律身以正待人以誠以孝友著於鄉里生平學問之道服膺戴氏戴氏所作孟子字義疏證當時讀者不能通其義惟榜以爲功不在禹下撰東原氏行狀載與彭進士尺木書笥河師見之曰可不必載戴氏可傳者不在此榜乃上書辨論今行狀不載此書乃東原子中立刪之非其意也藩是時在吳下見其書歎曰洪君可謂衛道之儒矣今錄其文於左文曰洪榜頓首笥河先生閣下前者具狀戴先生行實俾其遺孤中立稽首閣下之門求志其墓石頃承面諭以狀中所載答彭進士書可不必載性與天道不可得聞何圖更於程朱之外復有論說乎戴氏所可傳者不在此榜聞命唯唯惕於尊重不敢有辭退念閣下今爲學者宗非漫云爾者其指大畧有三其一謂程朱大賢立身制行卓絕其所立說不得復有異同疑於緣隙

奮筆加以釀嘲奪彼與此其一謂經生貴有家法漢學自漢宋學自宋今既詳度數精訓故乃不可復涉及性命之旨反述所短以揜所長其一或謂儒生可勉而爲聖賢不可學而至以彼矻矻稽古守殘謂是淵淵聞道知德曾無溢美必有過辭蓋閣下之旨出是三者仰見閣下論學之嚴制辭之愼然恐閣下尚未盡察戴氏所以論述之心與榜所以表章戴氏之意使榜且得罪不可以終無辭夫戴氏與彭進士書非難程朱也正陸王之失耳非止陸王也闢老釋之邪說耳非闢老釋也闢夫後之學者實爲老釋而陽爲儒書援周孔之言入老釋之教以老釋之似亂周孔之真而皆附於程朱之學閣下謂程朱大賢立身制行卓絕豈獨程朱大賢立身制行卓絕陸王亦大賢立身制行卓絕卽老釋亦大賢立身制行卓絕也唯其如是使後儒小生閉口不敢道甯疑周孔不敢疑程朱而其才智少過人者則又附援程朱以人老釋彼老釋者幸漢唐之儒抵而排之矣今論者乃謂先儒所抵排者特老釋之粗而其精者雖周孔之微旨不是過也誠使老釋之精者雖周孔不是過

則何以生於其心發於其事繆戾如彼哉况周孔之書  
具在苟得其解皆不可以強逼使程朱而聞後學者之  
言如此知必急急然正之也然則戴氏之書非故爲異  
同非緣隙釀嘲非欲奪彼與此昭昭甚明矣至謂治經  
之士宜有家法非爲宋學卽爲漢學心性之說賈馬服  
鄭所不詳今爲賈馬服鄭之學者亦不得詳夫言性言  
心亦不自宋以後興也周末諸子及秦漢間著書立說  
者多及之其辭雖殊其意究無大異凡以勸學立教而  
已惟老聃莊周之書乃有冲虛之說真宰之名不寄於

事不由於學謂之返其性情而復其初魏晉之間此學  
盛興而諸佛書流入中土亦適於此時爲盛其書本淺  
妄無足道譯者雜以老莊之旨緣飾其說大暢元風唐  
傳以曾言其事矣然而未敢以入儒書也至乎昌黎韓  
氏力闢佛老作爲原道等書使學者昭然知二氏之非  
而其時佛氏之說入人既深則又有柳子厚之徒謂韓  
氏所罪者其迹也忿其外而遺其中譬之知石而不知  
韞玉彼其不可斥者往往與易論語合不與孔子異道  
也此說一出後之學者往往執是說以求之易論語而

所謂易論語者則又專用魏王氏之注與何氏之集解  
其人本傑於老釋其說亦雜於二家此則宜其有合也  
歷唐之末逮宋之初此論紛紛固結而不可解於是讀  
易論語書者或往往先從事於二氏因卽以其有得於  
二氏之精者以說易論語之書是以眉山蘇氏作六一  
居士集序曰新學以佛老之似亂周孔之真識者憂之  
也宋熙甯以後此弊日深至於姚江王氏之學行則直  
以佛書釋論孟矣彼賈馬服鄭當時蓋無是弊而今學  
者束髮受書言理言道言心言性所謂理道心性之云

則皆六經孔孟之辭而其所以爲理道心性之說者往  
往雜乎老釋之旨使其說之果是則將從而發明之矣  
如其說之果非則治經者固不可以默而已也如使賈  
馬服鄭生於是時則亦不可以默而已也前之二說閣  
下苟詳察之亦知戴氏之非私於其學而榜之非私於  
戴氏矣至於聞道之名不可輕以許人猶聖賢之不可  
學而至如閣下以此爲慮此其猶存乎後儒之見也孟  
子謂聖人人倫之至首陽之義孔子稱曰古之賢人夫  
聖賢不可至蓋在是矣雖然安可以自棄乎哉若夫高

談深遠者謂之知道不言而躬行者謂之未聞道及夫  
治經訓者謂之儒林明性道者謂之道學此固戴氏所  
不道而榜所望於閣下表揚之者亦不在是也夫戴氏  
論性道莫備於其論孟子之書而所以名其書者曰孟  
子字義疏證焉耳然則非言性命之旨也訓故而已矣  
度數而已矣要之戴氏之學其有功於六經孔孟之言  
甚大使後之學者無馳心於高妙而明察於人倫庶物  
之間必自戴氏始也惟閣下裁察焉榜弟梧字桐生乾  
隆庚子

國朝漢學師承記卷六

十六

名試中書庚戌成進士授庶吉士散館授編修官至沂  
州府知府博古通今兼工詞翰榜同邑有汪萊者字孝  
嬰藩之密友也優貢生大學士祿康薦修  
國史天文志議叙以教官用選石埭縣訓導深於經學  
十三經注疏皆能背誦如流水而又能心通其義人有  
以疑義問者觸類旁通畧無窒礙尤善厯算通中西之  
術著有衡齋算學刊行於世與元和李尙之銳論開方  
題解及秦九韶立天元一法不合遂如寇仇終身不相  
見噫過矣然今之學者大江以南惟顧君千里與孝嬰

二人而已。烏可多得哉。孝與之友。有歛人羅子信者。名永符。丁卯舉於鄉。辛未成進士。選庶吉士。善讀書。通經達史。工詩古文。亦瓌奇之士也。洪瑩字賓華。甲子舉人。已。恩科第一人。及第。授修撰。淹通經史。五經皆有撰述。亦歛人也。

汪元亮字明之一字竹香。元和人。爲諸生時。有文譽。與同郡余古農師薛香聞師結詩社於城東。睥睨餘子不

國朝漢學師承記卷六

十七

可一世。乾隆壬午。與戴君東原同舉於鄉。相親善。乃究心經義。及六書之學。平生論學。則推東原。及程君易疇。論詩文。則推古農師。屢上公車。不第。以教授生徒。自給從游者。多撥科第去。而君以孝廉終命也。夫少時得狂疾。忽已忽作。作時不省人事。日夕叫罵。纏綿幾二十年。所有著述。於疾作時皆投諸火。僅存詩古文而已。

孔廣森李文藻

桂馥

孔廣森字東原。曲阜人。年十七中

乾隆戊子科舉人。辛卯成進士。官檢討。旋丁內艱。服闋

補官淡於世情陳情歸養忽遭家難爲訟所累扶病奔走江淮河洛間卒卒無歡悵未幾居大母與父喪竟以哀毀卒卒年三十有五少受經於東原氏爲三禮及公羊春秋之學能作篆隸書入能品尤工駢體文汪明經中孫觀察星衍亟稱之其序戴氏遺書曰緬惟樂遊講藝訪太傅於石渠元日談經坐侍中於重席時則玉羊旣遠金虎初開著學官者凡十四家說稽古者成數萬字至若五是六沴之徵定君陽武三科七缺之法樊獄淮南士苟通經皆能致用蓋原其授受本屬參商叙其

世年未睽昌闕是以祖之前師沿之後葉北方戎馬不能屏視月之儒南國浮屠不能改經天之義夫學有優劣者時也經有顯晦者數也五君晚出非漢博士之傳千禩相仍廢鄭司農之注縱橫異說別創先天顛倒聖文悉更後定特以腐儒炫視易謬驪黃末士明經原求青紫但遵甲令粗知帖括之詞疇克庚言紹彼先民之作敏而好學信而好古惟於戴君見之己君以梅姚售僞孔蔡謬悠妄云壁下之書猥有航頭之字古文一卷祇出西州小序百篇舊名北斗正謨攝諾歷黃序而僅

存月采豐刑。遭赤眉而已燼。乃或誤授伊訓。滋元年正月之疑。強執周官。推五服一朝之解。譬之爭年。鄭市本自兩非。議瓜驪山。良無一是。是用翦除假託。折衷羣洽。步驟五三。目錄四七。爲尙書義考。未成。成堯典一卷。又以要聞五際。尚論四家。毛傳孤行。是觴源於牟妙。鄭箋破字。每毫采於轅嬰。莫不假聲注文。以意逆志。誠古訓之所式。多識之所資也。雖其篇冠以叙。擇焉不精。或云託諸西河。或云造諸東海。然嗣音貽玖。何必欲色之音。交扈羅鴛。實爲陳古之刺。爲毛鄭詩考正四卷。別爲詩

補傳未成。成周南召南二卷。君之入書局也。西京客史。夙善徐生。東觀中文。遂分淹禮。乃取忠甫識誤。德明釋文。禪求亥亥之差。期復鶴都之舊。互相參檢。頗有整齊。削康成長衍之條。退喪服廁經之傳。爲儀禮正誤一卷。鄭斤粵罇之篇。備遺事職。穹蓋星弓之教。首列巾車。九經九緯。營國有方。五溝五涂。奠水有則。尋筵旣度。遂知洛邑之朝。圭藥未懸。孰辨營邱之夕。以至肆懸舞扇。五等琮璜。槐里樽空。椎成劍沒。大夫嫁女之器。未必皆眞。單于賄漢之銘。何嘗盡僞。誌鑑之所畫。績梁聶之所更。

釐不有參稽將無競爽爲考工記圖二卷古者冕服以祭弁服以朝祭則衣純朝則以布芾形連帶制異於直方屨色從裳次分於績繡周壇饗帝大裘降繁露之華魯禘嫌王旒璪飾丹雘之祝等威昭焉文質備焉道學起而儒林衰性理興而曲臺絕齊秦委武莫識稱名殷夏園章焉能考據溯增冰於積水示祭海於先河爲學禮篇一卷冠其文集十卷之首且夫一陰一陽之爲道見仁見知之爲性通於六籍之爲學辨於萬事之爲理謂理具靈臺則師智者得謂學遺象罔則悟寂者先豈

有畧窺語錄便詡知天解斥陽明卽稱希聖信洛黨之盡善疑孟氏之未醞其說空空其見小小蓋繹鄭君生質之訓誦周雅教本之箋所謂受中自天秉彜攸好孔提可案漢學非譌爲原善一卷孟子字義疏證三卷大學中庸補注各一卷君之學術此其大端歟景純有云爾雅者九流之津涉六藝之鈐鍵虎闈小學未束髮而知書豹鼠奇編不下席而觀古故辨言之樂對於三朝首基之文問於五始至於殊方別語絕代離詞皆轉注之指歸亦凡將之墜緒爲爾雅文字考十卷方言疏證

十三卷書教有六最夥諧聲叔重無雙惟傳解字若乃  
部分平仄母別見溪官家恨狹羊戎之所自爲天子聖  
哲梁武之所不信古人韻緩止屬椎輪後世音繁實精  
引墨君審其清濁導以源流旁通反紐發周沈之舊聞  
上協詩騷採顧江之新義爲聲韻考四卷聲類表十卷  
於是辨韻之餘留觀百氏研音之下雅愛三閭以爲娥  
臺訪女近窈窕之遺聲湘水奉芳續榛苓之逸響叔師  
注而未詳辨招附而不可核之漢志各從主人爲屈原  
賦注四卷自疇人分散鄒大失居九章中落昧商高積  
矩之言八線西來竊師氏旁要之算而耳聽下士穴見  
小儒不知五五之開方輒薄九九之賤技哨壺斗五律  
管徑三元晦以之存疑季通以之強說未知紀步何能  
讀宅柳之經未曉倨句何能治上輿之記爲九章補圖  
一卷原象一卷古厯考二卷歷問二卷昔趙商難禮先  
求五服之方景伯受詩卽涉七州之地君山川能說郡  
縣成圖酈元故籍證其綿襁崑渤今流條其脈絡爲戴  
氏水經注四十卷水地記一卷直隸河渠書六十四卷  
嗚呼君之著書可謂博矣君之見道可謂深矣向使壽

之以年行其所志。下安輪於都尉，授梯几於鴻臚。雍宮未建，命曹褒以定儀。大予將成，詔宋登而持節。雖復辨卿訟闕，公羊未必能明。子駿移書，逸禮難其置立。而太山郡將北面稱師，上蔡通侯西行受業。則河陽旣貴，輜車方賜於五更。君上從游，錄牒庶多於萬計。豈謂陰堂告稜，圓石鐫名。一經之寫定，無年三歲之瓊瑰。已夢清明，卷佚長封。下馬之陵，通德人亡。不待嗟蛇之歲，然而太元履詘。終遇桓譚，都養陳謨。彌尊伏勝，鄭鄉絕學。倘千百載而重興，戴氏遺書於十三經，其有補悲懷逝者。

國朝漢學師承記卷六

二十二

延佇將來，廣森深於戴氏之學，故能義探其原，言則於古也。世人徒賞其文詞之工，抑亦末矣。若有大戴禮記注十三卷儀鄭堂文集二卷，繼瀚字莊谷，乾隆庚辰科舉人。辛巳成進士官至戶部郎中。其子廣棻，東原之壻。繼涵深於三禮，校刊微波榭叢書，廣森之叔也。同時有李南礪者，名文藻，字素伯，一字荏晚，先世自棗強遷益都，遂爲益都人。文藻天資俊朗，年十三從父遠遊曹家亭，作記一篇，仿赤壁賦見者以爲神童。二十一補邑庠生。乾隆己卯中式本省舉人，明年成進士。久之，謁選廣

東恩平縣知縣三年俸滿擢桂林府同知未及一年卒  
居官有政績粵人至今稱之性好博覽不爲世俗之學  
聚書數萬卷手自讎校丹鉛不去手又好碑版文字游  
歷所至學宮寺觀巖崖石壁必停驂搜討有僕劉福者  
善椎拓攜紙墨以從有所得盡拓之又有一僕忘其名  
因拓摩崖刻石失足墮崖死文藻哭之慟生平樂道人  
善表章潛德如濟陽張處士稷若元和惠徵君定宇婺  
源江君慎修訪其遺書刊行之名曰貸園叢書德州梁  
鳴翥窮老篤學月必誦九經一過鄉里目爲癡人文藻

一見奇之爲之延譽遂知名於世曲阜桂馥字未谷亦  
深小學乾隆己酉科舉人庚戌成進士選教授保舉知  
縣補雲南永平縣知縣卒於官王篆刻世人重其技擬  
之文三橋云所著有許氏說文解字義證五十卷札樸  
十卷近日山左學者以郝君懿行爲巨擘焉懿行字恂  
九樓霞人嘉慶己未進士官主事著有山海經注乃實  
事求是之學若近世標竊膚淺者豈可同日而語哉棲  
霞又有牟廷相字默入覃谿學士爲藩言之後晤萊陽  
趙君曾始知其治今文尙書趙君字北嵐乾隆己酉舉

人分發江蘇以知縣用性好古錢及金石文字治經爲  
今文尙書三禮左氏春秋之學亦山左之翹楚也又有  
濟寧進士許君鴻磐字漸達者安徽侯補同知深於輿  
地之學七友凌君次仲亟稱之後見所著雪帆雜著一  
冊皆辨駁地理之說不在臆明祖禹之下其論內地及  
外裔山川瞭如指掌蓋四方經緯洞徹胸中故不爲皮  
傳之言也在京師與戴君金溪談及雪帆雜著金溪曰  
許君曾官指揮當時以俗吏目之失許君矣又有膠州  
王夏字蜀子號大村邑諸生喜爲詩與高密詩人李少  
宦兄弟友善好學篤古尤邃於經其持論多發前人所  
未發所有著述祕不示人於趙君北嵐處見其所作釋  
稷一篇穿穴經傳義明詞達可謂通人矣

國朝漢學師承記卷七

甘泉江藩纂

陳厚耀

字泗源泰州人康熙四十五年丙戌進士學問

淹通從梅徵君鼎爰歷算遂通中西之術李相國光地

薦厚耀通歷學

名見試以三角形令求中線又

問孤背尺寸厚耀具劄進呈稱

旨旋以省親乞歸里戊子

國朝漢學師承記卷七

特命來京己丑五月

駕幸熱河至密雲

命寫筆算式進呈少頃出

御書筆算問知此法否對曰

皇上此法精妙簡便臣法不可用

上諭曰朕將教汝汝其細心貫想以待朕問次日又問

問曰汝能測北極出地高下否對曰若將儀器測景長

短用檢入綫表可得高度此乃二分所測之法若餘節

氣又有加減之法然亦不準以地上有朦氣差以人目

視之有卑高映小爲大之異故也。又問地周三百六十度，依周尺每度二百五十里，今尺二百里，地周幾何？地徑幾何？奏云：依周尺地周九萬里，今尺七萬二千里，以圍三徑一推之，地徑二萬四千，以密率推之，當得地徑二萬二千九百一十八里有奇。問上復問地圍，出何書？對以髀算經會言之。

問何以見其圓也？對曰：職方外紀西人言繞地過一周四匝，皆生齒所居，故知其爲圓。且東西測景有時差，南北測星有地差，皆與圓形相合，故益知其爲圓。時厚耀

國朝漢學師承記卷之二

二

以母年高不忍離，乃就教職，得蘇州府教授，未踰年，召入南書房。

上問測景是何法，厚耀求

指示。

上曰：此法甚精，不必用八綫表，卽以西洋定位法開方法，虛擬法寫示，又

命至座旁，隨意作兩點於紙上，厚耀隨點之。

上用規尺畫圖，卽得兩點相去幾何之法。

上從容諭之曰：堯典敬授人時，乃帝王大事，奈何勿講。

嘗  
名入至淵鑿齋問難反覆並及天象樂律山川形勢得  
徧觀

御前陳列儀器

名至西煖閣詢問家世甚詳從至熱河

命賦泉源石壁詩授中書科中書傳

旨曰

上道汝學問好授汝京官使汝老母喜也

諭厚耀曰汝嘗言梅鼓成算學甚深今命來京與汝同

國朝漢學師承記卷七

三

修算法鼓成至

上問曰汝知陳厚耀否他算法近日精進向曾受教於

汝祖今汝祖若在尚將就正於彼矣乃

命厚耀成鼓並修書於蒙養齋

賜算法原本算法纂要同文算指嘉量算指幾何原本

周易折中字典西洋儀器金扇松花石硯及瓜菓等克

什癸巳書成

特授翰林院編修甲午丁內艱

命賜帑銀著江蘓織造經紀其喪服闋晉國子監司業

擢左諭德兼翰林院修撰充戊戌會試同考官己亥告  
病以原官致仕所著書有春秋戰國異辭五十六卷孔  
子家語注左傳分類禮記分類十七史正譌及天文麻  
算諸書又有春秋長麻十卷乃左傳分類中一門爲補  
杜預長麻而作其凡有四一曰麻證備引漢晉隋唐宋  
元諸史志及朱戴堦麻書諸說以證推步之異又引春  
秋屬辭杜預論日月差謬一條爲注疏所無大衍麻議  
春秋麻考一條亦唐志所未錄尤足以資考證二曰古  
麻古以十九年爲一章一章之首推合周麻正月朔且

冬至前列算法後以春秋十二公紀年橫列爲四章縱  
列十二公積而成表以求麻元三曰麻編舉春秋二百  
四十二年一一推其朔閏及月之大小而以經傳干支  
爲證佐皆述杜預之說而考辨之四曰麻存以古術推  
隱公元年正月庚戌朔杜預長麻則爲辛巳朔乃古術  
所推之上年十二月朔謂元年前失一閏以經傳干  
支排次知之厚耀則謂如預之說元年至七年中書日  
者雖多不失而與二年八月之庚辰三年十二月之庚  
戌四年二月之戊申又不能合且隱公三年二月己巳

朔日食桓公三年七月壬辰朔日食亦皆失之蓋隱公  
元年以前非失一閏乃多一閏因退一月就之定隱公  
元年正月爲庚辰朔較長厯實退兩月推至僖公五年  
止以下朔閏一一與杜厯相符故不復續載焉蓋厚耀  
精於厯法視預爲密於考證之學尤爲有裨治春秋者  
不可少此編矣又有春秋世族譜一卷亦左傳分類之  
一門也卒年七十有五

程晉芳

程晉芳字魚門一字戴園江都人家山陽饒於賞喜讀

國朝漢學師承記卷七 五

書蓄書五萬卷丹黃皆徧性又好客延攬四方名流與  
袁大令枚趙觀察翼蔣編修士銓爲詩歌唱和無虛日  
由此名日高而家日替矣累試南北闈不售乾隆二十  
七年

高宗純皇帝南巡

名試授中書後十年始成進士改主事旋授吏部員外  
郎與修四庫全書

欽命改翰林院編修君生而頤長美髮髯酒酣耳熱縱  
論時事則掀髯大笑少所容貸至於獎掖後進則有譽

無否也不善治生家事皆委之僕人坐此貧不能供饘粥以至責戶剝啄之聲不絕於耳而君伏案著書若無事者然後乞假游西安卒於巡撫畢沅署中君始爲古文詞及官京師與筒河師戴君東原游乃治經究心訓故著有周易知旨尙書今文釋義左傳翼疏禮記集釋勉行齋文集十卷菴園詩集三十卷

賈田祖

賈田祖字稻孫號禮畊高郵州人廩膳生乾隆四十二年試於秦州病經宿而卒藩亡友汪明經中誌其墓稱

國朝漢學師承記卷七

六

田祖好學多所瞻汲喜左氏春秋未嘗去手旁行斜上朱墨爛然善爲詩所作三千餘篇性明達於釋老神怪陰陽拘忌及宋儒道學無所惑伯兄有錮疾喜怒失中君事之曲得其欲與陽湖洪稚存同里李愔王念孫友善矜立名節猛志疾邪云云蓋力行篤學之士也藩未識其人亦未讀其所著書墓誌云旁行斜上者豈田祖爲春秋之表學歟然明經不輕許人其言可信也

李愔

李愔字成裕一字孝臣高郵州人祖兼五父佩玉皆有

篤行君治經通敏尤深於詩及春秋三傳之學晚好歷算得宣城梅氏書盡通其術與同郡劉君台拱王君念孫汪君中友善力倡古學君內性淳篤恂恂退讓不與人較然遇友朋患難則尚義有爲至死不變久困諸生以高第將貢於國學試之前夕執友賈田祖死君不入試親爲棺斂送歸其家容甫稱其勇於爲義有過賁育非虛語也乾隆四十四年己亥中式舉人明年成進士注選知縣襍被南歸不能家食時謝侍郎墉督學江蘇延之至暨陽書院君口不雌黃人物與世無忤然忌其

國朝漢學師承記卷七

七

學者於侍郎前日貢萋菲之言侍郎輕信讒言竟下逐客之令君嘗謂人曰容甫恃才傲物宜爲時所嫉予一生謹厚亦爲世人所忌豈命宮坐箕宿耶後得未疾終於家年五十一憶昔年君往江陰留宿潘家與君然燭豪飲議論史事君朗誦史文往往達旦明日潘取史文核之一字不誤也潘獲交於君時年少好詆訶古人君從容謂藩曰王子雍有過人之資若不作聖證論攻康成豈非瀟儒哉少頃又曰若夫佛氏輪迴因果之說淺人援儒入墨之論不可不辨子車氏所謂正人心息邪

說苟不力闢之。是無是非之心矣。嗚呼！自君謝世之後，二十餘年，藩坎珂日甚，而情性益戾，不聞規過之言，徒增放誕之行，可悲也。夫君所著有卜筮論、尙書古文說、金滕大誥康誥三篇、毛詩三條辨、大功章爛簡、文明堂考辨考工車制考、歷代官制考、左傳通釋、杜氏長、歷補說文引書字異考、渾天圖說、羣經識小、讀碎金詩文集，藏於家。

江德量

江德量字成嘉，一字秋史，儀徵人。父恂字子九，號蔗畦。

國朝漢學師承記卷七

八

拔貢生官至安慶府知府，有政聲。伯父昱字賓谷，號松泉。江都諸生，讀書好古，爲聲音訓詁之學，又好碑版文字，考核精詳，長於詩，著有瀟湘聽雨錄二卷、韻峽五卷、松泉集六卷。德量少承家學，勵志肄經，旣長，與同郡汪明經容甫爲文字交，其學益進。乾隆丁酉，選拔貢生，已亥舉人。庚子，汪如洋榜第二人，及第，授編修，改御史，歷掌浙江江西道德量精於小學，收藏碑版法書名畫古錢，著有泉志三十卷，又撰廣雅疏，未成而卒。

汪中

汪中。字容甫。先世居歙之古唐里。曾祖鎬京。始遷揚州。遂爲江都人。父一元。邑增生。君生七歲而孤。家夙貧。母鄒。緝屨以繼饗。冬夜藉薪而卧。且供爨給。以養親。力不能就外傳。讀母氏授以小學四子書。及長。鬻書於市。與書賈處。得借閱經史百家。於是博綜典籍。諳究儒墨。經耳無遺。觸目成誦。遂爲通人焉。年二十。李侍郎因培督學江蘇。試射雁賦第一。入學爲附生。時杭太史世駿。主安定書院。見君製述。深加禮異。所作詩文。必屬君視草。君僑寓眞州。沈按察廷芳。主樂儀講席。聞君議論。歎

國朝漢學師承記卷七

九

曰。吾弗逮也。年三十。客游於外。代州馮觀察廷丞。同郡沈太守業富。朱學使笥河先生。皆招至幕中。禮爲上客。同時鄭贊善虎文。王侍郎蘭泉先生。錢少詹竹汀。盧學士紹弓。並爲延譽。然母老家貧。中年乏嗣。戚戚少歡。歎世人之不知悼賦命之不偶。著弔黃祖文。狐父之盜。頌以寫懷自傷。而俗子以爲譏刺當世矣。乾隆四十二年。丁酉。謝侍郎墉督學江蘇。選拔貢生。每試別置一榜。署名諸生前。謂所取士曰。若能受學於容甫。學當益進也。又曰。予之先容甫。以爵也。以學。則北面事之矣。容甫以

勞心故病怔忡聞更鼓雞犬聲心忤忤動夜不成寐是以不與

朝考絕意仕進乾隆五十一年丙午朱文正以侍郎典試江南思得君爲選首不知君不與試也君感知遇之恩上書侍郎請執弟子禮侍郎旋奉

命督學浙江君往謁時爲述揚州割據之迹死節之人作廣陵對三千餘言博徵載籍貫串史事天地間有數之文也文多不載後畢尙書沅開府湖北君往投之命作琴臺銘甫脫稿好事者爭寫傳誦其文章爲人所重

國朝漢學師承記卷七

如此君治經宗漢學謂

國朝諸儒崛起接二千餘年沈淪之緒通儒如顧寧人閻百詩梅定九胡朏明惠定宇戴東原皆繼往開來者亭林始闢其端河洛圖書至胡氏而絀中西推步至梅氏而精力攻古文者閻氏也專治漢易者惠氏也及東原出而集大成焉擬作六儒頌未成好金石碑版嘗從射陽湖項氏墓得漢石闕孔子見老子畫像因署其堂曰問禮君情性伉直不信釋老陰陽神怪之說又不喜宋儒性命之學朱子之外有舉其名者必痛詆之每謂

人曰周禮天神地元人鬼今合而爲一。如文昌天神也。東嶽地元也。先聖先師人鬼也。天神地元世俗必求其人。以實之。豈不大愚乎。且言世多淫祀。尤爲惑人。心害政事。見人邀福祠禱者。輒罵不休。聆者掩耳疾走。而君益自喜於時流。不輕許可。有盛名於世者。必肆譏彈人。或規之。則曰吾所罵者。皆非不知古今者。惟恐莠亂苗爾。若方苞袁枚輩。豈屑屑罵之哉。然錢少詹事竹汀程教授易疇。王觀察懷祖。孔檢討衆仲。劉訓導端臨。李進士孝臣。諸君子。或以師事之。或以友事之。終身稱道弗衰焉。事母至孝。家無儋石儲。而參朮之進。滌髓之奉。嘗稱貸以供母疾。篤侍疾。晝夜不寢。滌膾之事。不任僕婢。無愁苦之容。有孺子之慕。時可謂孝矣。生平篤師友之誼。一飯之恩。終身不忘也。君中年輯三代學制及文字訓詁制度名物。有係於學者。分別部居。爲述學一書。屬稿未成。後乃以撰著之文。分爲述學內外篇。刊行之。又采揚州故實。始春秋至楊吳。作廣陵通典。藏於家。君一生坎坷。不遇。至晚年。有齏使全德耳。其名延君鑒別書畫。爲君謀生計。藉此稍能自給。而齏使素不以學問名。

嗟夫當世士大夫自命宏獎風流者皆重君之學而不能周其困乏於以知世之好真龍者鮮矣乾隆五十九年因校勘

文宗閣四庫全書往浙江借書讎對卒於西湖之葛嶺園僧舍盧學士抱經鮑丈以文梁君玉繩經紀其喪以歸卒年五十一子喜孫字孟慈嘉慶丁卯科舉人能讀父書長於考據傳其學藩弱冠時卽與君定交日相過從嘗謂藩曰予於學無所不窺而獨不能明九章之術近日患怔忡一構思則君火動而頭目暈眩矣子年富

國朝漢學師承記卷七

十二

力強何不爲此絕學以梅氏書見贈藩知志位布策皆君之教也君少喜爲詩不爲徘徊光景之作尤善屬文土苴韓歐以漢魏六朝爲則藩最重君文酷愛其自序一首今錄於左文曰昔劉孝標自序生平以爲比迹敬通三同四異後世誦其言而悲之嘗綜平原之遺軌喻我生之靡樂異同之故猶可言焉夫亮節慷慨率性而行博極羣書文藻秀出斯惟天至非由人力雖情符曩哲未足多矜余元髮未艾野性難馴麋鹿同遊不嫌擯斥商瞿生子一經可遺凡此四科無勞舉例孝標嬰年

失恃藐是流離托足桑門栖尋劉寶余幼罹窮罰多能  
鄙事賃舂牧豕一飽無時此一同也孝標悍妻在室家  
道轆軻余受詐與公勃谿累歲里煩言於乞火家構衅  
於蒸藜蹀躞東西終成溝水此二同也孝標自少至長  
戚戚無懽余久歷艱屯生人道盡春朝秋夕登山臨水  
極目傷心非悲則恨此三同也孝標夙擣羸疾慮損天  
年余藥畏鬪心負薪永曠鰥魚嗟其不瞑桐枝惟餘半  
生鬼伯在門四序非我此四同也孝標生自將家期功  
以上參胡列者十有餘人兄典方州餘光在壁余衰宗

零替顧景無僮白屋藜羹饋而不祭此一異也孝標倦  
遊梁楚兩事英王作賦章華之宮置酒睢陽之苑白璧  
黃金尊爲上客雖車耳未生而長裾屢曳余簪筆傭書  
倡優同畜百里之長再命之士苞苴禮絕問訊不遍此  
二異也孝標高蹈東陽端居遺世鴻冥蟬蛻物外天全  
余卑栖塵俗降志辱身乞食餓鴟之餘寄命東陵之上  
生重義輕望實交隕此三異也孝標身淪道顯藉甚當  
時高齋學士之選安成類苑之編國門可縣都人爭寫  
余著書五車數窮覆瓿長卿恨不同時子雲見知後世

昔聞其語今無其事此四異也孝標履道貞吉不干世  
議余天譴司命赤口燒城尖齒唬顏盡成臯狀跬步才  
蹈荆棘已生此五異也嗟夫敬通窮矣孝標比之則加  
酷焉余於孝標抑又不逮是知九淵之下尙有天衢秋  
茶之甘或云如薺我辰安在實命不同勞者自歌非求  
傾聽目瞑意倦聊復書之藩自遭家難後十口之家無  
一金之產跡類浮屠鉢盂求食睥睨紈袴儒冠誤身門  
衰祚薄養姪爲兒耳熱酒酣長歌當哭嗟乎劉子之遇  
酷於敬通容甫之阨甚於孝標以藩較之豈知九淵之

下尙有重泉食茶之甘勝於嘗膽者哉

顧九苞顧鳳毛

顧九苞字文子興化人博聞強記長於毛詩三禮母任  
子田之祖姑通經達史文子之學母教之也文子乾隆  
四十六年辛丑成進士未幾卒子鳳毛字超宗號小謝  
亦受經於祖母年十一通五經著有毛詩集解董子求  
雨考楚詞韻入聲韻考乾隆四十九年甲辰

高宗純皇帝南巡

名試

欽取二等後中戊申科副榜卒年二十七

劉台拱

劉台拱字端臨先世自蘇州遷居寶應父世暮官靖江縣訓導君生而岐嶷不好弄就塾讀書不離几席九歲作顏子頌斐然成章觀者稱爲神童年十六爲邑庠生二十一中乾隆三十五年辛卯科舉人屢試禮部不第銓授丹徒縣訓導君少失恃事繼母鍾如母丹徒去寶應三百里每年必迎二親至學署奉養無缺得親歡心體夙清羸疊遭大故飯蔬食淡哀毀過情卧病不起卒

國朝漢學師承記卷七

十五

年五十有五君六世祖永澄問學於戴山以躬行實踐爲王子孫世傳其學至君又習聞王子中朱止泉之緒論深研程朱之行以聖賢之道自繩然與人游處未嘗一字及道學也君學問淹通尤邃於經解經專主訓詁一本漢學不雜以宋儒之說著有論語駢枝一卷荀子補註一卷漢學拾遺一卷經傳小記三卷古文集一卷君勤於讀書嬾於著述不似今人鹵莽成書動輒盈尺也

鍾襄

鍾襄字保其一字鼓崖甘泉人與阮侍郎元焦孝廉循相善共爲經學旦夕討論務求於是君淡然無欲以讀書爲樂生平篤實敦善行交游中稱爲君子嘗撰漢儒考較陸元朗所載增多十餘人又有祭法考諸書舉優貢生卒阮侍郎爲刻考古錄四卷

徐復

徐復字心仲江都人本農家子所居南鄉乃互鄉也有子翁讀書者必羣起諱之心仲少孤喜讀書其兄使之牧乃棄牛而逃至郡西僧寺中爲僧供灑掃之役以餬

國朝漢學師承記卷七

十六

口暇則誦讀恒達旦不寢一日焦孝廉循憇寺中見其所誦之五經及所作制義大奇之爲之延譽於是爲鄉塾童子師未幾補諸生遂從事於經史之學甲寅省試與友人江都黃君承吉同寓黃君詰以九章算法不能答以爲恥典衣購算書歸時君攜婦入城與藩所賃之屋衡宇相望薄暮時卽執算書一冊來相質問未及一年弧三角之正弧垂弧次形矢較諸法皆能言其所以然矣後得虛損疾危篤時猶手執北齊書與友人講論語未畢而逝著有論語疏證藩爲之序君沒後無子婦

歸南鄉其兄鬻爲土豪妾而婦不知也詎以上塚賺至  
豪家婦忽舉止異常行狀聲音宛如心仲指豪大呼曰  
汝何人敢買我妻爲妾乎婦遂仆地其兄遁去俄頃婦  
醒遽入厨取厨刀自刎死其兄至今無恙也先世有良  
田百畝其兄惡心仲不務農而讀書疾之如仇乃避兄  
居城中不食兄之粟其死也能爲厲以全妻之節而不  
禍其兄豈不欲傷手足之情歟嗚呼君生不能叨一第  
之榮而身罹六極之備天之困通人皆此之酷耶其兄  
之所爲天實爲之也

國朝漢學師承記卷七

十七

汪光燧

汪光燧字晉藩號芝泉儀徵縣廩膳生其先人韓懷部  
郎諱棣與惠徵君松崖戴編修東原及王蘭泉先生王  
光祿函沚錢詹事竹汀爲莫逆交晉藩少承庭訓習聞  
諸老宿名論乃潛志讀書博通經史嘗著蕘稗釋一篇  
其說曰孟子五穀章不如蕘稗趙注云五穀雖美種之  
不成則不如蕘稗之草其實可食按蕘之說凡五說文  
蕘草名也爾雅蕘蕘菘蕘注云一名白蕘玉篇蕘茅始  
生又蕘桑也菘蕘也廣韻蕘秀詩靜女章自牧歸蕘傳

云黃茅之始生。碩人章。手如柔荑。傳云。如荑之新生。是也。稗之說。凡三。說文。稗。禾別也。釋文。引字林云。禾別名。玉篇。稗。稗也。廣韻。稗。稻也。又稗。草似穀。戴侗六書故。稗。葉純似稻。節間無毛。實似蕒。害稼。後漢書。光武紀。建武三十一年。陳畱雨穀形如稗。實。李賢引左傳。杜注云。草之似穀者。是也。但黃稗之黃。當爲藪。而非黃。按說文。藪。莢也。爾雅。藪。莢。註云。藪似稗。布地生。穢草。則藪之狀。可識。莊子。秋水篇。藪米之在太倉。又云。知天地之爲稗米也。釋文。引司馬云。稗米。小米也。李云。稗草也。則藪之實。

可考。孟子言五穀不熟。而比以藪稗者。取其類也。且莊子知北游。又云。道在藪稗。釋文作芻蒞。李云。二草名。又云。本又作稗。稗而爾雅。釋文云。藪。又作稗。引莊子云。道在稗稗。是也。則藪稗。或作稗。或作芻蒞。斷不作黃稗。是藪莢之藪。不同莖黃之黃。明矣。說文。禾部。無稗字。或缺耳。稗爲禾別者。以其形似禾。而別於禾。徐曰。似禾而別是也。玉篇。誤以爲稗。說文。稗不成穀也。稗無稗。訓。稗亦無稗。訓。以稗爲稗者。乃俗解。非古訓也。廣韻。又誤以爲稻。說文。稻。稌也。亦無稗。訓。唯其異於稻。所以有禾別。

之名若稻則何別矣。或疑易大過枯楊生稊。李氏易傳引虞翻易注云。稊稗也。楊葉未舒則字本作稊。釋文引鄭氏易注云。枯謂无姑山榆。蕒木更生。山榆實則字又作蕒。是稊蕒二字似可通非也。按詩七月章。猗彼女桑。傳云。女桑。蕒桑也。疏云。取周易枯楊生蕒之義。亦作蕒而不作稊。可見凡木更生皆爲蕒。則大戴禮夏小正。柳稊亦當作柳蕒。而不作柳稊矣。生蕒之蕒不得誤爲稊。則稊稗之稊亦不得訛爲蕒。但篆文二字相近。或傳寫之錯耳。又辨惠氏易爻辰圖之謬。予服其精深。文多不

國朝漢學師承記卷七

十九

載晉蕃夙患哮喘。羸瘦骨立。丁卯秋八月。應省試。歸病復作。遂卒。年四十有三。病中尙手批大戴禮。文選不置云。

李鍾泗

李鍾泗字濱石。其先阜寧人。父世璉。賣卜楊州市。遂居甘泉。濱石讀書性善記。人所作文一覽卽能闡誦。治經深於左氏春秋。撰規規過一書。抑劉伸杜。焦孝廉循。稱其書精妙詳博。而藩未之見也。濱石少孤。從黃大令洙讀四子書。黃君愛其聰穎。忽棄而學賈。一日誤碎肆中。

玻璃卮賈者責之濱石大哭黃君適過之曰所碎之器  
我償汝他賈者遂謝乃攜濱石歸謂其母曰此子能讀  
不能賈而使之賈何哉母曰家貧不能供修脯黃君曰  
第從我讀何修脯爲一年之後補邑庠生文名大著嘉  
慶六年辛酉舉於鄉其學益進嘗從藩問喪禮往覆問  
難發人所未發赴禮部試不第歿於京師

凌廷堪

凌廷堪字次仲一字仲子歙人也父文焜字燦然自歙  
遷於海州之板浦場遂家焉君十二歲卽棄書學賈俱

在友人家見詞綜唐詩別裁集攜歸就燈下讀遂能詩  
及長短句浙人張賓鶴見其詩詞大奇之告之板浦場  
大使湯某某敬禮之邀君至揚州是時鹺使置詞曲館  
檢校詞曲中之字句違礙者從事讎校得修脯以自給  
君之精於南北曲而能分別宮調者基於此也久客邗  
江爲華氏贅婿與黃明經文暘交明經勉君爲舉子業  
始學作八股文讀五經是時年已二十五矣後游京師  
受業於翁覃谿學士乃究心經史之學乾隆戊申順天  
副榜貢生己酉中式本省舉人庚戌成進士銓授寧國

府教授迎生母王至學署先意承志得親歡心母偶不  
憚必長跪以請俟母笑乃起母沒哀毀骨立背一目而  
妻亦相殂繼謝孑然一身居恒不樂至徽州依程君麗  
仲麗仲以師禮事之阮侍郎芸臺服闋復爲浙江巡撫  
延之課子得末疾終於歛君病時麗仲贈以紫團手煎  
湯藥其死也經紀其喪擬之古人其范巨卿之流歟君  
無子應繼兄子嘉錦嘉錦先君卒嘉錦兄嘉錫在海州  
聞訃以次子名德後嘉錦爲君之承重孫君讀書破萬  
卷肆經遂於士禮披文摘句尋例析辭聞者冰釋至於

聲音訓詁九章入綫皆造其極而抉其奧於史則無史  
不習大事本末名臣行業談論時若瓶瀉水纖悉不誤  
地理沿革官制變置元史姓氏有詰之者從容應荅如  
數家珍焉近時講學者喜講六書孜孜於一字一音苟  
問以三代制度五禮大端則茫然矣至於潛心讀史之  
人更不能多得也先進之中惟錢竹汀邵二澐兩先生  
友朋中則李君孝臣汪君容甫及君三人而已其於詩  
也不分唐宋門戶專論聲韻之協對偶之下詩餘亦不  
主一家而嚴於律今人之詞有一字不合者心指摘之

雅善屬文尤工駢體得漢魏之醕粹有六朝之流美在胡穉威孔臯軒之上而世人不知也弟子中最著者儀徵阮君常生字壽昌一字小芸從君受士禮校刊禮經釋例十三卷小芸好學深思不以才地矜物恂恂君子也宣城張君其錦字髮伯廩膳生精研章句不墮師承聞君沒徒步至歛訪君遺書無所得又北走海州於敗篋中擲拾殘稿假居僧寺輯錄以歸得燕樂考原六卷元遺山年譜二卷充渠新書二卷校禮堂文集三十六卷詩集十四卷梅邊吹笛譜二卷將謀劊劊可謂不負

師門矣嗟乎君冷宦無家白頭乏嗣雖死故鄉實同旅殯亦生人之極哀也已然而懷方之禮付於戚生昌黎之文編煩李漢斯又不幸中之幸也君久客揚州如劉君端臨汪君容甫諸君子以及宋君守端秦君敦夫焦君理堂阮君伯元楊君貞吉黃君春谷皆君之友也援寓公之例記於郡人之末云守端名綿初高郵州人乾隆丁酉拔萃科選儒學訓導邃深經籍尤長於詩著有韓詩內傳徵四卷子保字定之廩膳生候選訓導精於聲音訓詁之學敦夫名恩復一字澹生江都人乾隆癸

卯舉人丁未進士授編修讀書好古所居五筍仙館蓄書萬卷以校讎爲事丹鉛不去手校刊陶宏景鬼谷子注盧重元列子注隸韻諸書見人謙益不自滿亦絕口不談學問是以世無知者理堂名循一字里堂江都人家黃子湖嘉慶辛酉舉人聲音訓詁天文厯算無所不精淡於仕進閉戶著書五經皆有撰述刊行者羣經宮室圖考理堂算學北湖小志伯元名元一字芸臺儀徵人乾隆丙午舉人已酉進士授編修官至浙江巡撫今官詹事府少詹事於學無所不通著有考工車制考石

國朝漢學師承記卷七

經校勘記十二經注疏校勘記曾子注論語論仁論疇人傳等書貞吉名大壯一字竹廬甘泉人昭武將軍之裔也以世襲起家官至安徽參將病廢回籍日讀古經注疏尤精於厯算律呂之學春谷名承吉字謙牧江都人嘉慶戊午科解元乙丑成進士以知縣用分發廣西補興安縣知縣今罷官歸天資過人爲漢儒之學篤志研究得其精微通厯算能辨中西之異同又工詩古文自出機杼空無依傍寓神明於規矩之中不屑爲世俗之詩文者也又有儀徵許珩者字楚生能詩讀周官經

時有所得著周禮獻疑七卷能疑所當疑不疑所不當疑亦近時有心之士也

國朝漢學師承記卷七

二十四

國朝漢學師承記卷七

譚瑩玉生覆校

國朝漢學師承記卷八

黃宗羲字太冲餘姚人忠端公尊素之長子也生而岐嶷垂髫讀書不事舉業年十四補博士弟子員時魏忠賢弄國柄戕害清流忠端遭羅織死詔獄有覆巢毀卵之虞宗羲奉養王父及母以孝聞讀書晝夜分伏枕鳴

哭不敢令堂上知也思宗卽位攜鐵錐草疏入京訟寃至則逆奄已死有詔卹死奄難者贈官三品予祭葬

國朝漢學師承記卷八

一

蔭一子乃詣闕謝恩疏請誅曹欽程李實蓋忠端削籍乃欽程奉奄旨論劾而李實則成丙寅黨禍之首者也得旨刑部作速究問崇禎元年五月會訊許顯純崔應元對簿時出所袖錐錐顯純流血滿體顯純自訴爲孝定皇后外甥律有議親之條請從末減宗羲謂顯純與逆奄構難忠良盡死其手幾覆宗社當與謀逆同科以謀逆論雖如親王高煦尙不免誅况后之外親乎卒論二人斬時欽程已入逆案而李實辨原疏非實所作乃逆奄取其印信空本填寫故墨在硃上又陰致宗羲三

千金求勿質宗義卽奏稱李實今日猶能公行賄賂其辨詞豈足信哉於對簿時亦以錐錐之然丙寅之禍實由空本填寫得減死獄成偕同難子弟設祭於詔獄中門哭聲如雷聞於禁中思宗歎曰忠臣孤子朕心爲之惻然宗義與吳江周延祚光山夏承錐牢子葉咨顏文仲應時而斃二人乃斃諸君子於獄中者思宗憫其忠孝不之罪也宗義在京師毆應元胸拔其鬚歸焚而祭之思端木主前乃治葬事父寃既白之後日夕讀書十三經二十一史及百家九流天文歷算道藏佛藏靡不

究心焉忠端遺命以蕺山劉忠正公宗周爲師乃從之游又約吳越中嚮學者六十餘人共侍講席力排陶奭齡援儒入釋之邪說第宗炎字晦木宗會字澤望並負異才宗義親教之皆成儒者崇禎中復用涓人逆黨咸冀錄用而在廷諸臣或薦霍維華呂純如或請復涿州冠帶至陽羨出山特起馬士英爲鳳督士英以阮大鍼爲援奄黨又熾卽東林中如錢謙益以退閒日久亦相附和矣獨南都太學諸生仍持清議乃以大鍼觀望南中必生他變作南都防亂揭文宜興陳貞慧寧國沈壽

民貴池吳應箕蕪湖沈士桂共議署名東林子第首推  
無錫顧文端公之孫杲被難諸家推宗羲縉紳則推周  
儀部鏞大鉞銜之壬午入京陽羨欲薦宗羲爲中書舍  
人力辭不就遂南歸甲申之難報王立國大鉞驟起遂  
按揭一百四十人欲盡殺之時宗羲憂國勢難支之南  
都上書而禍作同邑有奄黨者糾劉忠正公及三弟子  
三弟子者都御史祁彪佳給事中章正宸與宗羲也遂  
與杲並逮駕帖未出而

大兵至得免南都歸

國朝漢學師承記卷八

三

命踉蹌回浙東時忠正已死節魯王監國孫嘉績熊汝  
霖以一旅之師畫江而守宗羲糾黃竹浦子弟數百人  
隨諸軍江上人呼之曰世忠營黃竹浦者宗羲所居之  
鄉也宗羲請如唐李泌故事以布衣參軍不許授職方  
司員外尋以柯夏卿孫嘉績等交章論薦改監察御史  
仍兼職方司事總兵陳梧自嘉興之乍浦浮海至餘杭  
縱兵大掠王職方正中行縣事集兵民擊殺之梧兵大  
噪有欲罷正中官以安諸營者宗羲曰乘亂以濟私致  
干衆怒是賊也正中守土爲國保民何罪之有監國從

之是年作監國魯元年大統歷頒之浙東馬士英南中  
脫走在方國安營欲入朝朝臣皆言宜誅之熊汝霖恐  
其挾國安爲患曰非殺士英時也使其立功自贖宗羲  
曰公力不能殺耳春秋之孔子豈能加兵於陳恆但不  
得謂其不當殺也汝霖大慚謝過焉遺書總兵王之仁  
曰諸公何不沈舟決戰由赭山直趨浙西而日於江中  
放船伐鼓意在自守也叢爾三府以供十萬之衆豈能  
久守乎總兵張國柱之浮海至也諸軍大驚廷議欲封  
以伯宗羲言於嘉績曰若封以伯則國柱益橫且何以

待後來有功者請署爲將軍從其請又力請西進之策  
孫嘉績以所部卒盡付之與王正中合軍得三千人正  
中之仁從子也以忠義自奮宗羲深結之使之仁不以  
私意撓軍事故諸軍與之仁有隙皆不能支餉而宗羲  
軍獨不乏食查職方繼佐軍亂披髮夜走投宗羲拜於  
牀下宗羲出撫其衆遂同繼佐西行渡海駐潭山烽火  
遍浙西太僕寺卿陳潛夫以軍同行尚寶司卿朱大定  
兵部主事吳乃武皆來會師議由海寧以取海鹽因入  
太湖招吳中豪傑百里之內牛酒日至直抵乍浦約崇

德孫頭爲內應會

大兵已戒嚴不得前復議再舉而王正中軍潰於江上宗羲走人四明結山寨自固殘兵從至者五百餘人駐軍杖錫寺微服潛出欲訪監國消息爲扈從計戒部下無妄動部下不遵節制擾山中民民潛焚其寨部將茅翰汪涵死之己丑聞監國在海上乃與都御史方端士赴之晉左僉都御史再晉左副都御史時方發便拜山寨諸營官宗羲言諸營之強莫如王翊乃心王室者亦莫如翊宜優其爵使之總諸營以捍海上朝臣皆以爲

國朝漢學師承記卷八

五

然俄而

大兵圍健跳城中危甚會蕩湖救至得免時熊汝霖劉中藻錢肅樂皆死宗羲失兵無援與尙書吳鍾巒坐船中講學推算歐羅巴憲法而已宗羲之從亡也母氏尙居故里

章皇帝下

詔凡前明遺孽不順命者錄其家口以聞宗羲聞之恐母氏罹罪陳情監國得請變姓名歸鍾巒棹三板船送三十里外哭別於波濤中是年監國由

健跳至翁州復名宗義副馮京第乞師日本之長崎島  
不得請宗義賦式微之章以感將士乃回甬上是時大  
帥治浙東凡得名籍與海上有涉者卽行剪除宗義雖  
杜門息景然位在列卿而江湖俠士多來投止馮侍郎  
京第結寨杜輿卽宗義舊部大帥習聞其事宗義名與  
馮侍郎並懸通衢有上變於大帥者首列宗義名捕者  
益急宗義竄匿草莽東徙西遷屢瀕於危然猶挾帛書  
招娒中鎮將遣使入海告警令爲之備而不克第宗炎  
與京第交通有狀被獲刑有日矣宗義潛至鄞以計脫

國朝漢學師承記卷八

六

之慈水寨主沈爾緒難作牽連宗義大帥遣人四出搜  
捕乃挈眷屬伏處海隅草間苟活迨海氛靖後宗炎  
聖祖仁皇帝如天之仁不復根追勝國從亡諸人宗義  
始奉母返里門復舉戴山證人書院之會從之請學者  
數百人嘗謂明人講學襲語錄之糟粕不以六經爲根  
柢束書不讀但從事於游談學者必先窮經經術所以  
經世乃不爲迂儒又謂讀書不多無以證斯理之變讀  
書多而不求於心則又爲僞儒矣故受其教者不墮講  
學之弊不爲障霧之言其學盛行於東南當時有南姚

江西二曲之稱。二曲者李中孚也。康熙戊午。

詔徵博學鴻儒。掌院學士葉方藹先以詩寄宗羲。慙息之。宗羲次韻答以不出之意。方藹商於宗羲門人陳庶常錫嘏。對曰。是將迫先生爲謝疊山矣。其事遂寢。未幾有

詔命葉方藹與同院學士徐元文監修明史。宗羲爲世家子弟。家有十三朝實錄。復嫻於掌故。方藹與元文又薦宗羲。乃與前大理寺評事興化李清同徵。詔督撫以禮敦遣。宗羲以母老及老病辭。方藹知不可

國朝漢學師承記卷八

七

致乃請

詔下浙江巡撫。就家鈔所著書。有關史事者。付史館。元文又延宗羲子百家。及鄞處士萬斯同。參訂史事。斯同宗羲之弟子。宗羲戲答元文書曰。昔聞首陽山二老。託孤於尙父。遂得三年食薇。顏色不壞。今吾遣子從公。可以置我矣。宗羲之學。出於蕺山。雖姚江之派。然以慎獨爲宗。實踐爲主。不恣言心性。墮入禪門。乃姚江之諍子也。又以南宋以後。講學家空談性命。不論訓詁。教學者說經則宗漢儒。立身則宗宋學。又謂昔賢闢佛。不檢佛

書但肆謾罵。譬如用兵不深入其險。不能勦絕鯨鯢也。乃閱佛藏。深明其說。所以力排佛氏。皆能中其窾要。國難時。遺老以衣鉢晦迹者。久之或嗣法上堂。宗義曰。是不甘爲異姓之臣。反爲異氏之子弟。宗會晚年好佛。爲之反覆辨論。極言其不可。蓋於異端之說。雖有託而逃者。亦不容少寬假焉。宗義性耿直。於友朋中多忤少可。周囊雲一人之外。皆有微辭。在南都時。見歸德侯朝宗。每宴以妓侑酒。宗義曰。朝宗之尊人。尙在獄中。而放誕如此乎。吾輩不言。是損友也。或曰。侯生性不耐寂寞。曰。

夫人而不耐寂寞。則亦何所不至耶。時人皆歎爲至論。及選明文。或謂當黜方域文。宗義曰。姚孝錫嘗仕金。元遺山終置之南冠之列。不以爲金人者。原其心也。夫朝宗亦若是矣。乃知其論人嚴。亦未嘗不恕也。平生勤於著述。年逾八十。尚矻矻不休。所著有明儒學案六十二卷。宋儒學案。元儒學案。易學象數論六卷。辨河洛方位圖說之非。授書隨筆一卷。則閻若璩問尙書而答之者。春秋曰食。歷一卷。律呂新義二卷。少時取餘姚竹管肉。孔勻者。截爲管而吹之。知十二律之四清聲。乃著是書。

孟子師說四卷因蔽山有論語大學中庸諸解獨無孟子以舊聞於蔽山之說集爲一書故名師說明史案二百四十四卷宏光紀年一卷龍武紀年一年永曆紀年一卷魯紀年一卷贛州失事紀一卷紹武事紀一卷四明山寨紀一卷海外痛哭記一卷日本乞師記一卷舟山興廢一卷沙定洲記亂一卷賜姓本末一卷汰存錄一卷糾夏考功幸存錄也授時厯故一卷大統厯推一卷授時厯假如一卷西厯假如一卷回厯假如一卷氣運算法勾股圖說開方命算測圓要諸書又有今水經

國朝漢學師承記卷八

九

四明山志台巖紀游匡廬游錄病榻隨筆明文海四百八十二卷與十五朝國史可互相參正續宋文鑑元文抄以補呂蘇二家之缺思舊錄姚江瑣事姚江文畧姚江逸詩自著年譜明夸待訪錄二卷南雷文案十卷外集一卷吾悔集四卷撰杖集四卷蜀山集四卷詩厯四卷又分爲南雷文定南雷文約合之得四十卷明夸留書一卷言王佐之畧崑山顧絳見而歎曰三代之治可復也又欲修宋史而未成僅存叢目補遺三卷宗羲以古文自命有志於明史雖未預修史而史局遇有大事

疑事必咨之。其論古文曰：唐以前句短，唐以後句長。唐以前字華，唐以後字質。唐以前如高山深谷，唐以後如平原曠野。自唐以後，爲文之一大變。然而文章之美惡，不與焉。其所變者詞而已，所不可變者，雖千古如一日也。此論足以掃近人規撫字句之陋習矣。晚年愛謝臯羽，踰髮集注冬青樹引西臺慟哭記，蓋悲臯羽之身世蒼涼，亦以自傷歟。康熙戊辰冬，營生壙於忠端墓側，中置石牀，不用棺槨。子弟疑之作葬制，或問一篇，援趙邪卿之例，毋得違命，自以身遭國難，期於速朽，不欲顯言也。卒之日，遺命一被一褥，卽以所服角巾深衣斂，遂不棺而葬。卒年八十有六。門生私謚曰文孝。學者稱爲南雷先生云。

### 顧炎武

顧炎武，本名絳，七酉改名炎武，字寧人，學者稱爲亭林先生。顧氏爲江東望族，五代時由吳郡徙徐州。南宋時遷海門，已而復歸吳。下遂爲崑山人。其先世在明正德間，有工科給事中。廣東按察使司僉事濠，濠之弟濟，刑科給事中。濟生兵部侍郎廣志，侍郎生左贊善紹芳，及

國子生紹芾。紹芳生官廕生。同應。同應之神子。卽炎武也。紹芾生同吉。早卒。聘王氏。未婚守節。以炎武爲之後。炎武生。而雙瞳子。中白邊黑。見者異之。讀書一目十行。性耿介。絕不與世人交。獨與里中歸莊善。同游復社。相傳有歸奇。顧怪之。曰。母王養炎武於襁褓中。撫育守節。事姑孝。曾斷指療姑疾。崇禎九年。直指王一鶚。請旌於朝。報可。乙酉之夏。母王年六十。避兵常熟。謂炎武曰。我雖婦人。然受國恩矣。設有大故。必死。是時。炎武方應崑山令楊永言之辟。與嘉定諸生吳其沆歸莊。共起兵。奉

故鄖撫王永祚。以從夏文忠公於吳。江東授炎武兵部司務事。不克。永言遁去。其沆死之。炎武與莊脫走。母王氏不食卒。遺言後人勿事二姓。次年。閩中使至。以職方郎召炎武。念母氏未葬。辭不赴。次年。幾豫吳勝兆之禍。葬事畢。將之海上。道梗不前。庚寅。有怨家欲陷之。僞作商賈。由嘉禾竄京口。遂之金陵。謁孝陵。變姓名爲蔣山。傭甲午。僑居神烈山下。遍遊沿江一帶。以觀山川之勝。有三世僕陸恩。見炎武久不歸。投身里豪家。炎武四謁孝陵。回持之甚急。恩欲告炎武通海。乃亟禽之。數其罪。

沈之水恩之婿某復投里豪謀報怨以千金賄太守告  
炎武通海不繫之訟曹而繫之奴家甚危急有爲求救  
於錢謙益謙益欲炎武自稱門下而後許之其人知不  
可而恐失事機乃私書一刺與之炎武聞之急索刺還  
不得列揭文於通衢以自白謙益聞之曰寧人何其卞  
也時有路舍人澤溥者故相文貞公振飛之子寓洞庭  
東山識兵備使者爲之懇寃其事遂解乃五謁孝陵遂  
北行懇田於章邱長白山下戍戍遍游北都謁長陵以  
下圖而記之次年再謁十三陵而念江南山水有未游

者復歸六謁孝陵東游至會稽次年復北謁思陵攢宮  
由太原大同以入關又北走至榆林康熙甲辰與李因  
篤同謁攢宮爲文以祭往代州墾田每言馬伏波田疇  
皆從塞上立業欲居代北曰使吾澤中有牛羊千則江  
南不足懷矣然又苦其地寒但經其始使門人掌之丁  
未之淮上次年取道山東入京師萊黃培之奴姜元銜  
告其主詩詞悖逆案多株連又以吳人陳濟生所輯忠  
節錄指爲炎武作炎武聞之馳赴山左自請繫勘李因  
篤爲告急於有力者親往歷下解之獄釋復入京師五

謁思陵從此策馬往來河北諸邊塞者十餘年丁巳六  
謁思陵後始卜居華陰嘗謂人曰徧觀四方惟秦人慕  
經學重處士持清議而華陰縮轂關河之口雖足不出  
戶而能見天下之人聞天下之事一旦有警入山守險  
不十里之遙若志在四方一出關門亦有建瓴之勢乃  
定居焉王徵君山吏築齋延之炎武置田五十畝於華  
下供晨夕又餌沙苑蒺藜而甘之曰啖此久不肉不茗  
可也蓋以蒺藜苗佐餐以子代茗故有此語東坡詩曰  
朝廷開明史館大學士孝感熊公錫履主館事以書招

國朝漢學師承記卷八

十三

炎武答曰願以一死謝公戊午詞科主館事以書詔下諸公爭欲致之炎武作書與門人之在京師者曰  
刀繩具在無速我死次年大修明史諸公又欲薦之乃  
貽書葉學士訥庵請以身殉得逸或曰先生蓋亦聽人  
一薦薦而不出其名愈高矣笑曰此所謂釣名者也今  
夫婦人之失所天也從一而終之死靡慝其心豈欲見  
知於人若曰蓋亦令人強委禽焉而力拒之以明吾節  
則吾未之聞矣崑山相國元文弟兄炎武之甥也尙書  
乾學未遇時炎武振其困乏至是一門鼎貴以書迎之

南歸爲買田置宅拒而不往或叩之答曰昔歲孤生飄  
搖風雨今茲親串崛起雲霄思歸尼父之轅恐近伯鸞  
之竈且猶吾大夫未見君子徘徊渭川以畢餘年足矣  
庚申其妻沒於家寄詩輓之而已次年卒於華陰年六  
十有九無子自立從子衍生爲後門人奉喪歸葬高第  
子吳江潘耒收其遺書序而傳之撰述之書有左傳杜  
解補正三卷音論三卷詩本音十卷易經三卷唐韻正  
二十卷古音表二卷韻補正一卷營平二州地名記一  
卷求古錄一卷金石文字記六卷石經考一卷日知錄

三十卷天下郡國利病書及肇域志二書未成炎武留心經世之術游歷所至以二馬二騾載書自隨至西北  
阨塞東南海陬必呼老兵退卒詢其曲折與平日所聞  
不合卽發書檢勘其所著天下郡國利病書聚天下圖  
經歷朝史籍以及小說筆記明十三朝實錄公移邸報  
之類有關於朝政民生者酌古通今旁推互證不爲空  
談期於致用肇域志則專論山川要阨邊防守戰之事  
蓋炎武周流西北垂三十年邊塞亭障皆經目擊故能  
言之了了也晚年篤志六經精研深究居華陰有請講

學者謝曰：近日二曲以講學得名，遂招逼迫，幾致凶死。雖曰威武不屈，然而名之爲累，則已甚矣。况東林覆轍，有進於此者乎？有求文者，告之曰：文不關於經術政事者，不足爲也。韓文公起八代之衰，若但作原道諫佛骨表，平淮西，禪張中丞，傳後叙，而一切諛墓之文，不作，豈不誠山斗乎？在關中，論學曰：諸君關學之餘也。橫渠藍田之教，以禮爲先。孔子嘗言博我以文，約我以禮，而劉康公亦云：民受天地之中以生，所謂命也。是以有動作禮義威儀之則，以定命。然則君子爲學，舍禮何由？近來

講學之師，專以聚徒立幟爲心，而其教不肅。方將賦茅鷄之不暇，何問其餘哉？炎武生性兀傲，不諧於世，身本南人，好居北土。嘗謂人曰：性不能舟行食稻，而喜餐麥跨鞍。又謂北方之人飽食終日，無所用心，南方之人羸居終日，言不及義，好行小慧。時人謂其評論切中南北學者之病。嘗至京師，東海兩學士延之夜飲，怒曰：古人飲酒卜晝不卜夜，世間惟淫奔納賄二者皆夜行之，豈有正人君子而夜行者乎？其狷介嫉俗如此。於同時諸君子，雖以苦節推百泉二曲，以經世之學推黎洲，至於

論經評史亦不苟同也。

節甫曰：記成之後，客有問於予曰：有明一代，囿於性理，汨於制義，無一人知讀古經注疏者。自黎洲起而振其頽波，亭林繼之，於是承學之士，知習古經義矣。所以閤百詩、胡臚、明諸君子，皆推挹南雷、崑山。今子不爲之傳，豈非數典而忘其祖歟？予曰：黎洲乃戴山之學，矯良知之弊，以實踐爲主。亭林乃文清之裔，辨陸王之非，以朱子爲宗。故兩家之學皆深入宋儒之室，但以漢學爲不可廢耳。多騎牆之見，依違之言，豈真知灼見者哉？客曰：

二君以瓌異之質，負經世之才，思見用於當世，垂勲名於來葉。讀書論道，重在大端，疏於末節，豈若抱殘守缺之俗儒，尋章摘句之世士也哉？然黃氏闢圖書之謬，知尙書古文之僞，顧氏審古韻之微，補左傳杜注之遺，能爲舉世不爲之時，非豪傑之士耶？

國朝諸儒，究六經奧旨，與兩漢同風。二君寶啟之菜瓜，祭飲食之人，芹藻釋馨宗之奠，乃木本水源之意也。况若璩四書釋地，曲護紫陽，臚明洪範正論，直譏劉向，於此則從寬假之條，於彼則嚴踰閑之辨，非有心軒輊者。

乎。予曰：甲申乙酉之變，二君策名於波浪礪灘之止，竄身於榛莽窮谷之中，不順天命，強挽人心，發蛙黷之怒，奮螳螂之臂，以烏合之衆當

王者之師，未有不敗者矣。逮夫故土焦原，橫流毒浪之後，尙自負東林之黨人，猶效西臺之慟哭。雖前朝之遺老，實周室之頑民，當名編熏胥之條，豈能入儒林之傳哉。客曰：固哉子之說也。我

祖宗參化育之功，體生成之德，不但不加以誅戮，抑且招之使來，所以突圍猛獸，得以遁跡山林，漏網長鯨，亦

國朝漢學師承記卷八

十七

復响濡江海。此伊古以來未有之寬仁厚澤也。我

高宗純皇帝御批通鑒輯覽乙酉一年，不黜留都位號，

唐柱二主併爲竊據續編卽

欽定明史亦倣宋史甲戌乙亥之例大書而特書矣。是

以祁彪佳熊開元皆有列傳，核二君事蹟，祁熊之流也。

今子不尊

聖人至公之心，而爲拘牽之論，何所見之不廣耶。予曰：噫，吾過矣。退而輯二君事實爲書一卷，附於冊後。

國朝漢學師承記卷八

譚瑩玉生覆校

跋

古者國家有巡守封禪朝聘燕饗明堂宗廟辟雍之儀天子廣集衆儒講議典禮損益古今之宜推所學以合於世用根底六經憲章四代先王制作之精義可攷而知焉自後儒以讀書爲翫物喪志義理典章區而爲二度數文爲棄若弁髦箋傳注疏束之高閣又其甚者肆其創獲之見著爲一家之言綴王肅之危詞棄鄭君之奧論末學膚受後世滋惑經學浸微蓋七百年矣國朝漢學昌明超軼前古閻百詩駁僞孔梅定九定歷

國朝漢學師承記跋

算胡朏明辨易圖惠定宇述漢易戴東原集諸儒之大成哀然著述顯於當代顧門之學於斯爲盛至若經史詞章金石之學貫穿勃穴靡不通擅則顧甯人導之於前錢曉微及先君子繼之於後可謂千古一時也若夫矯誣之學震驚耳目舉世沿習罔識其非如汪鈍翁私造典故其他古文詞支離抵牾體例破壞方靈皋以時文爲古文三禮之學等之鄩自以下毛西河肆意譏彈譬如秦楚之無道王白田根據漢宋比諸春秋之調人惡莠亂苗似是而非自非大儒孰有能辨之者吾鄉江

先生博覽羣籍通知作者之意聞見日廣義據斯嚴  
論經生授受之指輯爲漢學師承記一書異時采之  
下傳之其人先生名山之業固當附此不朽或如司馬  
子長史記班孟堅漢書之例撰次叙傳一篇列於卷後  
亦足屏後儒擬議規測之見尤可與顧寧人錢曉徵及  
先君子後先輝映者也喜孫奉手受教服膺有年被命  
跋尾不獲固辭謹以所聞質諸坐右未識先生以爲知  
言不也

嘉慶十有七年五月七日後學汪喜祿識

國朝漢學師承記跋

二

嘉慶十有七年五月七日後學汪喜祿識

先生博覽羣籍通知作者之意聞見日廣義據斯嚴  
論經生授受之指輯爲漢學師承記一書異時采之  
下傳之其人先生名山之業固當附此不朽或如司馬  
子長史記班孟堅漢書之例撰次叙傳一篇列於卷後  
亦足屏後儒擬議規測之見尤可與顧寧人錢曉徵及  
先君子後先輝映者也喜孫奉手受教服膺有年被命  
跋尾不獲固辭謹以所聞質諸坐右未識先生以爲知  
言不也

右 國朝漢學師承記八卷附錄 國朝經師經義目

錄一卷 國朝江藩撰 洪惟 昭代經學脩明 定鼎

之初顧亭林胡拙明閻百詩諸先生崛起遠紹兩漢諸

儒之墜緒篤實淳懿恪守師法承先啟後私淑有人實

宋元明以來所未有鄭堂特著此書 國朝經師學行

出處著撰緒論搜括靡遺洵盛業也阮文達定香亭筆

談稱元和惠徵君定宇經學冠天下鄭堂於惠氏弟子

余君仲林盡得其傳洪北江詩話亦稱其學有師法珠

湖草堂筆記則稱是書極有史家體裁鄭堂久在阮文

國朝漢學師承記跋

一

達幕府文達撰 國史儒林傳稿第一次顧亭林居首

第二次黃梨洲居首而是書以兩先生編於卷末以不

純宗漢學也亦可見其體例之嚴然如玉蘭泉侍郎傳

記及其以五七言詩章立門戶譏其太邱道廣一事洪

北江詩話稱侍郎所選詩一以聲調格律為準其病在

於以己律人而不能各隨人之所長亦頗有微詞亦何

至於鄭堂所云也又北江傳記及其出示所出古文指

摘其用事訛舛斷斷強辨一事北江詩話則稱鄭堂過

畢弇山宮保墓道詩曰公本愛才勤說項我因自好未



國朝經師經義目錄

甘泉江 藩纂

易

魯商瞿子木受易於孔子。五傳至齊田何子莊。子莊之後，有施孟、梁邱之學。施，施雠也。孟，孟喜也。梁邱，梁邱賀也。又有京氏學。京氏，京房也。從梁人焦延壽學易。延壽嘗從孟喜問易。喜死，房以延壽易，即孟氏學。翟牧、白生不肯，皆曰非也。然則京生之學，實出於焦贛，長於災異。非孟氏易明矣。又有費氏易。費氏名直，本以古字號古。

國朝經師經義易

文易無章句，徒以彖象繫辭、文言、解說上下經。成帝時，劉向典校書，考易以爲諸家說，皆祖田何。大義畧同，惟京氏爲異。又以中古文易經校易。孟梁邱之易經，或脫去无咎悔亡。惟費氏經與古文同。京兆陳元扶風馬融河南鄭眾北海鄭元潁川荀爽，並傳費氏易。沛人高相治易與費氏同時，其易亦無章句。專說陰陽災異，自言出丁將軍傳至相丁將軍，丁寬也。受田何易，是爲高氏。易漢初立易楊氏博士。楊氏，字叔元，田何之弟子也。宣帝後立施孟梁邱之易。元帝又立京氏易。費高二易，民

間傳之。後漢費氏興而高氏微矣。永嘉以來，鄭元、王弼二注列於國學。至南齊，易用鄭義。隋唐始專主王弼。而漢晉諸儒之注皆亡。惟唐李鼎祚《周易集解》博採諸儒之說。如孟喜、京房、馬融、鄭元、荀爽、劉表、宋衷、虞翻、陸績畧存一二。於是卦氣六日七分、游歸飛伏爻、辰交互消息、升降納甲之變，半見等例，藉此可以推尋。無如王韓清談、程朱理學，固結人心，或詆爲穿鑿，或斥爲邪說。先儒古義，棄如土梗矣。夫易爲卜筮之書，秦火未燔，商瞿受易以來，傳授不絕。則漢儒之說，以商瞿爲祖，商瞿之

國朝經師經義易

二

說孔子之言也。嗟乎！孔子之言，可以謂之穿鑿，謂之邪說哉！蓋自王輔嗣、韓康伯之書行，二千餘年，無人發明漢時師說。及東吳惠氏起而導其源，疏其流，於是三聖之易，昌明於世，豈非千秋復旦哉！

國初老儒亦有攻王弼之注，擊陳搏之圖者。如黃宗羲之易學象數論，雖闢陳搏康節之學，而以納甲動爻爲僞象。又稱王輔嗣注簡當無浮義。黃宗炎之周易象辭圖書辨惑，亦力闢宋人圖書之說，可謂不遺餘力矣。然不宗漢學，皆非篤信之士也。惟毛奇齡、仲氏易推易始

宋春秋占筮書易小帖四書頗宗舊旨不雜無詞但以變易交易爲伏羲之易反易對易之外又增移易爲文王周公之易牽合附會不顧義理務求詞勝而已凡此諸書不登茲錄

易圖明辨十卷擲謂易說六卷韞擲周易述二十三卷  
易漢學八卷易例二卷周易本義辨證五卷韞擲易述  
贊二卷擲擲榜周易虞氏義九卷虞氏消息二卷韞擲易  
音三卷擲擲

書

國朝經師經義書

三

尚書有二一爲今文伏生所授也一爲古文孔安國所傳也書本有百篇孔子序之遭秦滅學至漢唯濟南伏生口傳二十八篇一堯典合舜典爲一篇二皋陶謨合益稷爲一篇三禹貢四甘誓五湯誓六盤庚七高宗彤日八西伯伐黎九微子十卅誓十一洪範十二金縢十三大誥十四康誥十五酒誥十六梓材十七召誥十八洛誥十九多士二十無逸二十一君奭二十二多方二十三立政二十四顧命合康王之誥爲一篇二十五呂刑二十六文侯之命二十七柴誓二十八秦誓又河內

女子得泰誓一篇獻之。共二十九篇。伏生作尚書傳四十一篇。以授同郡張生。張生授千乘歐陽生。歐陽生授同郡兒寬。寬授歐陽生之子。世世傳之。至曾孫歐陽高。謂之尚書。歐陽之學。又有夏侯都尉。受業於張生。以授族子始昌。始昌傳族子勝。爲大夏侯之學。勝授從子建。別爲小夏侯之學。於是有歐陽大小夏侯三家。訖漢東京。相傳不絕。是爲今文尚書。漢武帝時。魯恭王壞孔子宅。得古文尚書。孔安國以今文字讀之。皆起增多一十六篇。舜典一。汜作二。九共三。大禹謨四。棄稷五。五子之

國朝經師經義書

四

歌六。允征七。湯誥八。咸有一德九。典寶十。伊訓十一。肆命十二。原命十三。武成十四。旅獒十五。栗命十六。鄭康成謂之二十四篇者。分九共爲九篇也。遭巫蠱事。不得列於學官。故稱逸書。亦稱中古文。其傳之者。都尉朝。朝授膠東庸生。庸生授胡常。常授徐敖。敖授王璜。涂暉。暉授桑欽。成哀時。劉向父子。校理祕書。皆見之。後漢賈徽。受業於涂暉。傳子達。又有孔僖者。安國後也。世傳其學。尹敏。周防。周磐。楊倫。張楷。孫期。亦習古文。又有扶風杜林。得西州漆書。互相考證。以授衛宏。徐巡。馬融。亦傳其

學鄭君康成先受古文於張恭祖既又遊馬融之門乃淵源於孔氏又通杜林漆書者是爲古文尙書然增多之一十六篇馬融云絕無師說蓋安國以今文讀之校其文字習其句讀而已漢儒重師承無師說者不敢強爲之解則張楷之注賈逵之訓馬融之傳康成之注亦但解伏生所傳之二十八篇其一十六篇皆無注釋也所以謂之逸書逸書者非逸其文其說逸而無考也其後武成亡於建武之際至東漢之末允征伊訓猶有存者故康成注書間一引之如禹貢注引允征典寶注

引伊訓之類迄乎永嘉師資道喪二京逸典咸就滅亡江左中興元帝時豫章內史梅賾奏上孔傳古文尙書自云晉太保公鄭冲以古文尙書授扶風蘇愉愉授天水梁柳柳授城陽臧曹曹授汝南梅賾賾所上之書增多古文二十五篇一大禹謨二五子之歌三允征四仲虺之誥五湯誥六伊訓七太甲上八太甲中九太甲下十咸有一德十一說命上十二說命中十三說命下十四泰誓上十五泰誓中十六泰誓下十七武成十八旅獒十九微子之命二十蔡仲之命二十一周官二十二

君陳二十三。畢命二十四。君牙二十五。罔命是爲偽古文尚書。僞孔傳齊建武中。吳姚方興於大航市。得舜典一篇。奏上。比馬鄭注多。曰若稽古帝舜。曰重華協于帝。濬哲文明。溫恭允塞。元德升聞。乃命以位。二十八字。乃分堯典之半爲舜典。此又僞中之僞也。時梁武爲博士。駁之。遂不行。至唐孔穎達爲正義。取僞孔書。又取此說。反斥鄭氏所述之二十四篇爲張霸僞造。霸僞造者。乃百兩篇時。成帝劉向以古文校之。非是。遂黜其書。漢書儒林傳。先述孔壁逸書。後叙百兩篇。則逸書非百兩明。

國朝經師經義書

六

矣。且逸書及百兩篇。劉向父子領校祕書時。皆得見之。豈有向明知其僞。而撰別錄。仍取霸書乎。歆撰三統。歷述伊訓。武成。畢命。諸篇。悉孔壁古文。豈有歆亦知其僞。而反取其說乎。仲遠之說。可謂游談無根矣。自此以後。正義大行。而馬鄭之注。皆亡。至宋吳棫。朱子。始疑其僞。繼之者。吳草廬。郝京山。梅鷺也。然皆未能抉其奧。探其蘊。逮

國朝閻氏惠氏出。而僞古文。寢微。馬鄭之學。復顯於世矣。



傳魯人孟仲子。孟仲子傳根牟子。根牟子傳趙人孫卿子。孫卿子傳魯人大毛公。漢書儒林傳云：毛公，趙人，治詩，爲河間獻王博士，授同國貫長卿。長卿授延年，延年授號徐敖，敖授九江陳俠，或云陳俠授謝曼卿。三說不同，未知孰是。後漢鄭衆賈逵傳，毛詩馬融作注，鄭元作箋，於是毛傳大行，而三家廢矣。魏王肅又述毛非鄭，王基駁王申鄭，孫毓爲詩評，評毛鄭，王肅三家同異，而朋於王。陳統又難孫申，鄭王鄭兩家互相掎擊，皆本毛傳。自漢及五代，未有不本毛公而別爲之說者，有之自歌。

國朝經師經義詩

八

湯修詩本義始於經義，毫無裨益，專務新奇而已。修開妄亂之端，於是攻小序者不一其人，攻大序者不一其人。若毛傳鄭箋，則棄之如糞土矣。至程大昌之詩論，王栢之詩疑，變本加厲，斥之爲異端邪說可也。至其國朝崇尚實學，稽古之士崛起，然朱鶴齡之通義，雖力駁廢序之非，而又採歐陽修、蔣轍、呂祖謙之說，蓋好博而不純者也。鶴齡與同里陳啟源商榷毛詩，啟源又著稽古編三十卷，惠徵君定宇亟稱之。其書雖宗鄭學，訓詁聲音以爾雅爲主，草木蟲魚以陸疏爲則，可謂專門。

名家矣。然而解西方美人，則盛稱佛教東流，始於周代。至謂孔子抑藐三皇而獨聖於西方，解捕魚諸器，謂廣殺物命，恬不知怪，非大覺緣果之文，莫能救之。妄下斷語，謂庖犧必不作網罟，吁，可謂怪誕不經之談矣。以佛說解經，晉宋間往往有之，然皆襲其說而改其貌，未有明目張膽若此者也。顧震滄之毛詩類釋，多鑿空之言，非專門之學，亦在刪汰之列。谷景帝初成問，王叔言詩說三卷，隄闕毛鄭詩考正四卷，隄震詩本音十卷，顯賦詩音表一卷。

隄 姑

國朝經師經義詩

九

秦氏坑焚禮，經缺瓌。漢興魯高堂生傳士禮十七篇，卽今之儀禮也。而魯徐生善爲容，景帝時河間獻王好古，得古禮獻之。古文禮五十六篇，記百三十一篇。周禮六篇，其十七篇與高堂生同，而字多異。或曰河間獻王開獻書之路，有李氏上周官五篇，失冬官一篇，乃購千金，不得取考工記以補之。卽今之周禮也。禮記者本孔子門徒共撰所聞，以爲此記，後人各有損益。中庸子思所作緇衣，公孫尼子制月令，呂不韋撰王制，漢時博士所

爲陳邵周禮論序云戴德刪古禮二百四篇爲八十五篇謂之大戴禮戴聖刪大戴禮爲四十九篇是爲小戴禮後漢馬融盧植考諸同異附戴聖篇章去其繁重及所叙畧而行於世卽今之禮記也傳禮經者自瑕邱蕭奮授東海孟卿卿授同郡后蒼及魯瑕邱卿其古禮經五十六篇蒼傳十七篇所餘三十餘篇以付書館名爲逸禮蒼說禮號后蒼曲臺記授聞人通漢及戴德戴聖慶普由是禮有大小戴慶氏之學普授息侯敬又傳族子咸大戴授徐良小戴授橋仁楊榮新莽時劉歆爲國

國朝經師經義禮

十

師始立周官經杜子春受業於歆授鄭興父子此士禮周官授受源流也慶氏曲臺其亡已久傳禮記者馬融盧植鄭康成自晉及唐三禮皆用鄭注至宋儒潛心理學不暇深究名物度數所以於禮經無可置喙然必欲攻擊漢儒乃於周禮中指摘其好引讖緯而已南宋以後始改竄經文補亡之說興矣士禮十七篇文詞古奧宋儒畏其難讀別無異說至敖繼公始疑喪服傳非子夏所作而注文隱攻鄭氏巧於求勝於是郝敬之臆斷奇齡之吾說起矣延祐科舉之制易詩書春秋皆以宋

儒新說與注疏相參。惟禮記則專用注疏。至陳澧乃爲集說一書。不從鄭注。於是談禮記皆趨淺顯而不問古義矣。至

國朝如萬斯大、蔡德晉、盛百二。雖深於禮經。然或取古注。或參妄說。吾無取焉。方苞輩則更不足道矣。

周官祿田考三卷。攷形禘祫說二卷。韞擬周禮疑義舉要七卷。攷永考工記圖二卷。攷震弁服釋例十卷。攷大車制考一卷。攷錢站

儀禮鄭注句讀十七卷。監本正誤一卷。石經正誤一卷。

國朝經師經義禮

張爾儀禮小疏一卷。攷形儀禮釋宮譜增注一卷。攷永

儀禮管見四卷。攷諸儀正禮譌十七卷。追攷儀禮圖六

卷。攷聽禮經釋例十三卷。攷擬

深衣考一卷。攷黜明堂大道錄八卷。攷擬禮記訓義釋

言八卷。深衣考誤一卷。攷永深衣釋例二卷。攷擬

附三禮總義

禮說十四卷。攷擬禮經綱目八十五卷。攷永禮箋十卷。

擬金榜

春秋

孔子作春秋爲之傳者左邱明公羊高穀梁赤及鄒氏  
夾氏鄒氏無師夾氏有錄無書皆不顯於世傳於世者  
左氏公穀三家邱明作傳以授曾申申傳吳起起傳其  
子期期傳鐸椒椒傳虞卿卿傳荀況況傳張蒼蒼傳賈  
誼誼傳至其孫嘉嘉傳貫公貫公傳少子長卿長卿傳  
張敞及張禹禹傳尹更始更始傳其子咸及翟方進胡  
常常授賈護護授陳欽劉歆從尹咸及翟方進受左氏  
歆授賈徽徽傳子達達受詔列公羊穀梁不如左氏四  
十事奏之又作左氏訓詁於是鄭衆馬融服虔皆爲左

國朝經師經義禮

十一

氏學至和帝元興十一年鄭興父子奏上左氏乃立於  
學官遂盛行江左中興用服氏注後專用杜氏而諸家  
之注廢矣傳公羊者胡毋生董仲舒仲舒傳褚大羸公  
段仲溫呂步舒羸公授孟卿及眭宏宏授嚴彭祖顏安  
樂由是公羊有嚴顏之學數傳至孫寶後漢何休爲之  
注傳穀梁者瑕邱江公受於魯申公其學寢微惟梁廣  
浩星公二人受焉蔡千秋周慶丁姓皆從廣受穀梁千  
秋又事浩星公爲學最篤宣帝卽位聞衛太子好穀梁  
乃詔千秋與公羊家並說上善穀梁說後又選郎十八

從千秋受會千秋病死。徵江公孫爲博士。詔劉向受穀梁欲令助之。江博士復死。乃徵周慶丁。姓待詔使卒。授十人。十餘歲皆明習。乃召五經名儒。太子太傅蕭望之等。大議殿中。平公羊穀梁同異。望之等多從穀梁。由是大盛。又有尹更始事千秋傳其學。又受左氏傳爲章句十五卷。繼之者唐固。縻信。至隋時。穀梁用范甯注。是時左氏學大行。二家鮮習之者。至唐趙匡啖助陸淳始廢傳談經。而三傳束置高閣。春秋之一大厄也。有宋諸儒之說春秋皆啖趙之子孫而已。

國朝經師經義禮

十三

國朝爲左氏之學者。吳江朱氏無錫。顧氏而鶴齡。雜取邵寶王樵之說。而不採賈服震滄之大事表。雖精然實以宛斯之書爲藍本。且不知著書之體。有不必表者。亦表之。甚至如江湖術士之書。以七言爲歌括。不值一噓矣。茲不著錄。宋以後貴文章。治左氏公穀。竟爲絕學。阮君伯元云。孔君廣森深於公羊之學。然未見其書。不敢著錄。餘做此云。

左傳杜解補正三卷。顧黻左傳事緯十二卷。附錄八卷。鷓鴣春。秋長歷十卷。春秋世族譜一卷。陳厚左傳補注。

六卷 總擬春秋左傳小疏一卷 辨形春秋地理考實四

卷 紅 永

附三傳總義

春秋說十五卷 總擬

論語

論語者孔子應答弟子及時人所言或弟子相與言而接聞夫子之語也鄭康成云仲弓子夏等所撰定漢興傳者魯論語齊論語古論語三家傳魯論者龔奮夏侯勝韋賢賢弟元成扶卿夏侯建蕭望之齊論語則有問

國朝經師經義論語

十四

王知道二篇凡二十二篇其二十篇中章句頗多於魯論傳之者王吉王卿貢禹五鹿充宗膠東庸生古論語出孔壁中二十一篇有兩子張篇次與齊魯不同孔安國為傳馬融亦注之張禹受魯論於夏侯建又從庸生王吉受齊論擇善而從號曰張侯論包咸周氏並為章句鄭元就魯論張包周之篇章考之齊古為之注焉魏何晏又為集解梁陳鄭何並立於學官唐則專用何注而鄭注亡矣至南宋朱子始以論語孟子及禮記中之中庸大學二篇合為四書盛行於世凡四書類及經總

義類皆附於此。

四書釋地一卷四書釋地續一卷四書釋地又續二卷

四書釋地三續二卷四書釋地餘論一卷攔黠鄉黨圖

考十卷黠永孟子字義疏證三卷黠震論語後錄五卷

黠站論語駢枝一卷攔黠

附經總義

九經誤字一卷顛黠九經古義十六卷韃黠羣經補經

五卷顛永經義雜記三十卷顛秋古經解鈎沈三十卷

顛黠經讀考異義證一卷顛億經傳小記三卷顛黠

國朝經師經義爾雅

爾雅

爾雅一書張揖云釋詁一篇周公作釋言以下或言仲

尼所增子夏所足叔孫通所益梁文所補漢儒為此學

者健為舍人劉歆樊光李巡孫炎後用郭璞注而各家

之注俱亡凡方言釋名小學諸書皆附於後

爾雅正義二十卷顛黠方言疏證十三卷顛震釋名疏

證八卷釋名補遺一卷續釋名一卷顛秋小學鈎沈二

十卷字林考逸八卷顛黠說文解字義證五十卷顛桂

別雅五卷顛玉

附音韻

音論三卷唐韻正二十卷古音表二卷韻補正一卷  
韻賦古韻標準四卷四聲切韻表四卷音學辨微一卷  
撰聲韻考四卷聲類表十卷撰震四聲均和表五卷示  
兒切語一卷撰核

音入樂

古者六籍五經禮樂並重周衰禮壞樂微迨秦燔書而  
樂之遺籍埽地盡矣漢興制氏以雅樂聲律世爲樂官  
能記其鏗鏘鼓舞而不能言其義其後樂人竇公獻樂

國朝經師經義樂

十六

章武帝時河間獻王作樂記與制氏不相遠內史丞王  
定傳之以授常山王禹成帝時禹爲謁者獻記二十四  
卷劉向校書得樂記二十三篇與禹不同其道寢微魏  
晉以後典章廢棄卽班志所載二十三篇已不復得於  
是遂爲絕學

國朝諸儒蔚起搜討舊聞雖樂制云亡而論音律者求  
周尺漢尺之遺尋審律審音之旨俾二千餘年之墜緒  
彰明宇宙不誠繼往開來之偉業哉若斯之類不可泯  
滅因別立一類以附卷末

律呂新論二卷律呂闡微十卷撰永律呂考文六卷撰  
撰燕樂考原六卷撰

家大人既爲漢學師承記之後復以傳中所載諸家  
撰述有不盡關經傳者有雖關經術而不酌者乃取  
其專論經術而一本漢學之書倣唐陸元朗經典釋  
文傳注姓氏之例作經師經義目錄一卷附於記後  
俾治實學者得所取資尋其宗旨庶不致混莠於苗  
以硤爲玉也著錄之意大凡有四一言不關乎經義  
小學意不純乎漢儒古訓者不著錄一書雖存其名

國朝經師經義樂

十七

而實未成者不著錄一書已行於世而未及見者不  
著錄一其人尙存著述僅附見於前人傳後者不著  
錄凡在此例不欲濫登固非以意爲棄取也次列旣  
鈞承命繕錄因不揣禱昧著其義例於末嘉慶辛未  
夏月旣望男鈞謹識

國朝經師經義

譚瑩玉生覆校



